

東
華
續
錄

東華續錄

乾隆九十五

臣王先謙敬編

臣周瀚蕃恭校

乾隆四十七年壬寅春正月庚子諭據陳輝祖閔鶚元覆奏胞弟陳嚴祖閔鶚元在甘省州縣任內捏災冒賑及餽送王亶望等銀兩伊二人知而不舉實屬昧良負恩請交部治罪各摺甘省自王亶望爲藩司與蔣全迪等通同一氣侵帑婪贓種種不法爲從來未有之奇貪異事內外諸大臣俱隱忍不言竟無一人舉發陳奏而陳輝祖閔鶚元之胞弟尤係案內人犯其平日家信往來必有確切音問屢經降旨詢問乃始終掩飾枝梧不肯奏出實情及嚴切究問若再如前巧言搪塞不但將伊等交部審訊朕必親自廷鞫今始據陳輝祖閔鶚元等各奏稱伊弟婪贓舞弊從前亦有所

聞並有家信往來止因一經陳奏恐伊弟必罹重罪是以隱忍瞻
徇致涉欺飾實屬罪無可逭請交部嚴加治罪等語是伊二人之
知而不舉俱已自行供認如出一口似屬實情至此案未經發覺
之先朕已早有風聞因案情重大徘徊遲疑者已閱數年昨歲因
蘇四十三之事遣大學士阿桂等統兵往剿伊等摺內常稱連得
雨澤因降旨詢問該省向來年年報旱何以今歲得雨獨多其中
必有捏飾情弊因而層層致詢顯露端倪阿桂李侍堯亦知事難
掩覆遂和盤托出朕思其事不得以人數稍眾竟置不問但朕深
以不能道德齊禮使伊等格心方引以爲愧至齊之以刑尤屬不
得已之苦心陳輝祖閱鶚元畢沅俱係讀書之人當明理義豈不
知朕辦理此案之始末乎無論陳輝祖閱鶚元各有伊弟在甘省
其一切通同舞弊之事朕早知其必有確切音信來往卽畢沅久

任陝西巡撫並前在甘省兩署督篆於該省各州縣侵冒官帑歷年積弊亦無不知之理乃竟巧爲支飾欲於朕前嘗試試問朕爲何如主乎五倫莫重於君父子爲父隱尙爲情理所有古純臣大義滅親父且有不能爲子隱者况兄弟乎若以其弟焚賊不法恐徑行舉發罪及其弟因而爲之隱忍是止知有手足之私情而不知有君臣之大義顛倒瞽亂莫此爲甚且陳輝祖等若於此事未經敗露之先早爲陳奏朕必嘉其公正不但不加之罪必特爲褒獎以風勵舉朝諸臣之緘默不言者卽末減其弟之罪亦未可知是伊二人之弟之陷於重罪非國法也乃伊二人使之也伊等旣甘心隱忍於前及降旨詢問又復希圖掩護隱躍其詞於後仍冀日久或有憐伊二人爲因弟受屈者尙得謂之有天良者乎此時卽將陳輝祖閔鶚元革職交刑部治罪伊等亦無可置喙惟是將

來爰誓既定朕斷不肯因其弟株連遽寘重典且此案內外大臣皆知而不舉又何獨歸罪於陳輝祖閔鶚元二人見在督撫一時乏員陳輝祖閔鶚元尙屬能事著加恩免其治罪仍照畢沅之例降爲三品頂帶各留本任所有應得職俸養廉永行停支以示懲創嗣後陳輝祖閔鶚元畢沅俱不許呈進貢物卽尋常土貢亦著一例停止並令奏事處存記如陳輝祖等仍前奏進貢品卽行駁回不必轉爲呈進陳輝祖等務各返躬自愧洗心滌慮潔己奉公庶幾可以稍贖前罪如或因停其廉俸藉詞需索致有簠簋不飭之事王亶望是其前車朕必加倍重治其罪不能再爲曲貸也所有陳輝祖等覆奏之摺俱著發鈔將此通諭中外知之○辛亥命江蘇查禁烏槍○甲寅復增西藏辦事筆帖式一員○乙卯建盛京文溯閣貯四庫全書○戊午停止伊犁向內地販買貨物○辛

酉諭甘省折收冒賑案內侵帑捏結各員業據李侍堯審明分別
定擬具奏至臬司福甯前在平慶道任內扶同捏結本應革職抄
產第念該員於此案舞弊實情首先供出且於接捕安定等處逆
酋馬明心家屬黨羽尙屬出力福甯著革職從寬留任八年無過
方准開復○丙寅第一分四庫全書告成○丁卯諭昨閱進呈一
統志內國朝松江府人物止載王頊齡王鴻緒諸人而不載張照
其意或因張照從前辦理貴州苗疆曾經獲罪又其獄中所題白
雲亭詩語意感憤經朕明降諭旨宣示中外因而此次纂辦一統
志遂將伊姓氏里居槩從刪削殊屬非是張照不知朕辦理其案
之公衷而反挾私怨恨誠非大臣公忠體國精白一心之道然其
文采風流實不愧其鄉賢董其昌卽董其昌亦豈竟純全之正人
君子哉使竟不登志乘傳示藝林致一代文人學士不數十年竟

歸泯沒可乎況從前張照之獲罪因疑爲鄂爾泰傾陷其獄中憤
怨之詞亦大都指摘鄂爾泰者居多蓋鄂爾泰欲置伊於死地朕
若聽信其言張照豈獲生全彼不知朕非信讒之主而鄂爾泰又
豈能讒張照之人卽如朕初政時戶部尙書缺出果毅親王保薦
右侍郎托時朕以海望乃左侍郎資俸旣深 皇考眷注亦優特
予擢用夫鄂爾泰之力必不能過於果親王果親王尙不能薦用
一尙書豈鄂爾泰能構一尙書致死耶嗣念張照究係可用之材
因出之囹圄不數年間由內閣學士洊擢刑部尙書供奉內廷是
朕之待張照始終成全原不以一眚之微終始擯棄可謂極儒臣
之榮遇卽將來國史中亦當令載筆之臣將伊事蹟詳晰編入何
此時纂辦一統志轉佚其名耶總之張照雖不得謂醇儒而其資
學明敏書法精工實爲海內所共推重瑕瑜不掩公論自在所有

此次進呈之一統志卽將張照官秩出處事蹟一併載入其各省志書或有似此者纂修諸臣皆宜查明奏聞補入並通諭中外知之○諭本日吏部將侍郎杜玉林查審沙金鳳控告胞兄沙金龍等霸產搶奪財物一案並未將案犯提齊究審卽行完結瞻徇草率議以降三級調用不准抵銷一本已照籤批發矣此案沙金龍父子欺壓霸占疊肆搶竊連年訐訟地方官置而不辦特命杜玉林前往查審自應提集案犯秉公研訊俾案無疑實方爲不負任使况從前欽差審辦案件未有結案後重複赴京控告者卽有虛捏翻控之案及派大臣覆行鞠審亦未有似此罪名出入者乃杜玉林審辦沙金龍父子起意搶竊各案旣不能提集正犯嚴究主使情節率聽嚇令頂充之畢顯貴等認爲正犯定擬完結而於署知州徐士勳到任兩年延閣不辦之故並未附摺劾參該員係杜

玉林同鄉其爲有心袒護已屬顯然難逃朕之洞鑒若不嚴予處分將來欽差大臣查辦案件皆如此相率效尤朕將何以用人乎此案杜玉林卽照部議實降以示懲儆並將此通諭中外知之

二月戊辰朔轉美晟爲刑部左侍郎以汪承霈爲刑部右侍郎梁敦書爲左副都御史

由湖北布政使遷

○己巳 上御經筵○以四庫全

書成 上御文淵閣賜宴並賞賚有差○辛未 上幸南苑行圍

○丙子 上還京師○丁丑軍機大臣刑部議覆據陝甘總督李

侍堯奏鎮迪道巴彥岱前在鎮西府任內收受經方餽送銀一千

兩見任鎮西府富明阿明知經方虧空因恐分賠不行查揭均請

照例擬流應如所請巴彥岱照侵盜錢糧一千兩杖流例富明阿

照故出人罪死囚未放減一等杖流例俱從重改發新疆效力贖

罪得旨此案巴彥岱在鎮西府任內收受經方餽送銀一千兩明

知該犯虧空帑項已逾數萬因受賄在先憚於舉發又恐自身將致賠累是以甘爲徇隱覈其情罪與署鎮西府之富明阿並未收受餽送銀兩止係庇護不行揭報者輕重懸殊軍機大臣會同該部覈擬時自應按例將巴彥岱比照經方斬決之罪減一等定擬斬候方爲允協乃率照李侍堯原擬將巴彥岱富明阿均擬杖流改發新疆殊屬錯謬定此案之軍機大臣刑部堂官及李侍堯俱著交部議處此案巴彥岱改爲應斬監候秋後處決餘依議甘肅各官上下通同一氣目無法紀至於如此雖王直望一人之作俑而官官相護之風至於舉朝皆然朕竟不能以誠感眾實爲慚慙不知眾人以爲何如○庚辰諭原任布政使陳用敷前在廣東道員任內因失察黎匪滋事等案部議革任自屬咎所應得但念其究屬因公與私罪有閒尙堪棄瑕錄用見在廣西按察使姚梁丁

憂所遺員缺著加恩以陳用敷補授○諭軍機大臣等福康安奏謝賞貂褂摺及糧價單俱用黃綾此皆無益之費朕於一切無不節儉伊所深知著傳諭福康安嗣後除年節賀摺俱不必妄用黃綾○甲申諭安南國王黎維禡前因盤獲逃犯周貴遣使押送入關賞給段匹等物齎奏陳謝並備具方物附表進呈念其專使遠來不令齎回卽准留充正貢以示優恤今據兩廣總督巴延三奏該國王復行具表奏稱接奉恩旨准將此次謝恩儀物充作正貢下方葵藿無以將誠懇請此次奉進方物仍爲謝儀洎四十八年歲貢之期欽遵常例奉貢等語具見該國王恭順惻忱深可嘉尙若復行卻還轉無以達該國述職輸誠之意所有此次隨表方物該部卽行收受其四十八年應進正貢著減常年所進貢物之半至嗣後該國王遇有陳謝章奏一槩毋庸備物隨表呈進以副朕

柔惠遠人至意並令該督巴延三傳知該國王遵諭行該部知道
○乙酉諭甘省各州縣折收監糧捏災冒賑一案其捏結之道府
直隸州前經降旨革職交李侍堯查審有無通同舞弊及別項款
蹟分別定擬具奏茲據李侍堯查明將止經捏結並未收受屬員
銀兩之道府秦雄飛劉光昱等一十八員俱定擬已經革職無庸
議經軍機大臣會同該部覆准降旨允行此等捏結之各道府以
屬員收捐折色之監糧作爲實貯遇有災荒復聽從王亶望蔣全
迪等朋比爲奸豫定分數分派各州縣結報扶同申詳覈其情節
卽與虛出通關無異按律科罪實所應得止因甘肅通省各官情
罪更有重大於此者不得不於嚴示創懲之中特予加恩未減設
在他省則執法定擬秦雄飛諸人烏得竟置勿論且道府爲方面
大員訪察屬吏是其專責卽有上司抑勒何難直揭部科乃甘爲

扶同出結國家亦安用此道府爲乎見在全案爰書已定前任捏結之道員秦雄飛等俱已格外加恩旨赦回籍嗣後自當永不錄用以儆官邪各省道府各官有稽查結報之責者均當引爲前鑒儻有似此誣捏袒庇屬員之事一經察出朕必按律重治其罪不得以秦雄飛等諸人之例謂可倖邀寬宥也將此通諭中外知之三月己亥 上親耕藉田○庚子 上啓鑾幸盤山○免經過地方額賦十分之三○壬寅 上駐蹕盤山○乙巳諭朕恭閱 實錄內載原任廣西巡撫撫蠻滅寇將軍傅宏烈當吳三桂肆逆時督師討賊屢著勤勞嗣復捐軀死事忠藎可嘉因令軍機大臣行查傅宏烈原籍有無子嗣會否出仕茲據奏稱查明傅宏烈後裔見存曾孫傅世海一人又六世孫傅徽龍等三人俱未出仕等語傅宏烈係爲國宣勞效命之臣後裔式微深堪憫惻著傳諭郝碩

卽將傅宏烈會孫一人及六世孫三人此四人內調取驗看擇其中人材有可造就者一人將伊平日所習或文或武之處據實保送到部帶領引見再降諭旨尋奏傅宏烈會孫傅世海文武皆無可造就又六世孫傅徽龍年九歲徽琥年六歲徽奉年四歲皆甫就學見飭收入書院肄業俟年及歲時選擇一人保送引見下部知之○停止臺灣捐監例○庚戌 上回鑾○辛亥諭浙江海塘歲功後停止歲修柴塘○壬子諭軍機大臣等本日農起與羅布藏多爾濟將阿拉善鹽斤商人不能領運緣由會奏一摺朕以其事既不可行當卽照常批示及閱農起另摺所奏稱大同朔平等屬地處沿邊向係買食口鹽其平蒲澤潞解絳等屬四十四州縣俱係銷食河東引鹽太原汾州甯武代忻等屬四十四州縣係刮食土鹽不經商運其土鹽不敷之時民人零星販買蒙古口鹽以

濟土鹽之不足見因查辦鹽斤一事體察民情咸額請將口鹽弛禁又稱見在積存口鹽七百餘萬斤商運雖屬難行而民販往來實爲妥便等語此奏欠明晰殊不可解豈有商運難行而民販反能行之理商獨非民乎晉省沿邊各府屬居民向食口鹽嗣以商力疲乏恐官鹽墮運曾經降旨飭禁今因商辦仍多拮据而居民又願食口鹽是以令農起會同羅布藏多爾濟悉心籌酌准各商就地之遠近將口鹽與官鹽一例販運行銷既可便民亦可通商原期兩有裨益且商民一理未有便於民而獨不便於商者乃農起輒據該商等以轉運口鹽山路崎嶇所需運本重大無力承辦爲辭卽將行銷蒙古鹽斤之處奏請停止此必係農起新任該省巡撫於鹽務利弊未能深悉偏聽地方各官詳稟遽行入告而地方官又未免瞻顧商人甚或留此籤派充商一節以爲朘剥富戶

地步是以仍請照例停運口鹽爲便其於商人運腳成本究竟如何不便之處又並未切實指陳至其另摺所奏大同朔平等處一帶民人隄其自行赴口販運此等民人商人獨不可雇而用之乎又稱專食土鹽之處於官引原無干礙而口鹽又在所必需並查詢見在蒙古有積存鹽斤以蒙古之有餘補內地之不足源源接濟委屬兩有裨益之語是又爲周旋羅布藏多爾濟起見若作和事老人者然殊不知封疆大吏於地方公事關係商運民食利病自應秉公定議不得存依違兩可之見調停完事且口外鹽斤旣聽沿邊一帶及專食土鹽各處居民自行赴彼販賣不歸商運則小民惟利是圖其銷食河東引鹽之平蒲等屬四十四州縣如何設法查禁不至透漏有妨官引之處農起亦未逐一詳悉籌畫分晰奏明設有不便將來又如何辦理著傳諭農起伊係初任該省

巡撫於此事無可瞻顧迴護自應一秉天良徹底通盤籌算將歷年各屬商民實在情形及地方官有無籤派富戶充商之事再口外鹽斤是否可以行銷並如何設法調劑不至有礙官引使商民兩得其便可以永遠遵行之處另行秉公據實熟籌妥議詳悉具奏到日再降諭旨○癸丑楊魁因病解任調雅德爲福建巡撫以尙安爲廣東巡撫祥鼎爲陝西布政使○甲寅 上還京師○乙卯免甘肅積年逋賦

夏四月戊辰諭國家養兵衛民期於得用遇有調遣若能奮勇爭先克敵制勝必立加獎拔卽或臨陣傷亡亦槩予優卹所以勸勵戎行恩至渥也若兵丁身列行閒不思效用竟至畏葸脫逃自應立正刑誅以彰憲典並不得以人數眾多稍從寬減明季軍政廢弛隨征兵丁每多臨陣懼怯望風潰散此皆平日紀律不嚴罔知

法度以致貽誤國事或由上恩不下逮或由劣將扣克軍糧我朝無此事也前次進勦金川脫逃綠旗兵丁本皆罪應斬決之犯特因事隔多年不忍槩予駢誅是以特降恩旨予限一年准其自首免死改發新疆復於本年三月內意其未能徧知恩旨再予寬限展至明年九月此實朕法外施仁於無可寬減之中予以一綫生路逃兵等稍有人心自應卽時投首乃各省投報到案者甚屬寥寥是該犯等並改遣之罪亦圖倖免可謂施之以恩而不知感德之以法而不知畏冥頑不靈莫此爲甚拏獲正法伊等亦死而無怨惟是各省督撫接奉節次所降恩旨後爲日已久茲始據福康安奏到川省自首逃兵三名而他省並無奏報者是福康安辦理此事頗見認真其各督撫不過委之州縣出示城署了事並未督飭各屬實力奉行多方曉諭俾窮鄉僻壤一一周知以致潛匿逃

兵未能共悉恩旨自行呈首仍致被獲羅法豈不負朕法外施仁之意耶督撫之於州縣當如臂之使指方能驅策得力若似此空文塞責有名無實封疆大吏實心任事者豈宜如此所有各省督撫著通行申飭嗣後務須各據天良嚴飭所屬將前降恩旨刊刻簡明告示分發徧貼廣爲傳播以期家喻戶曉俾得及早呈投自全軀命逃兵等經此諄切曉諭三令五申之後尙有仍前伏匿不首者一經拏獲必當立行正法決不寬貸將此再行通諭中外知之○庚午諭軍機大臣等據御史錢澧參奏山東巡撫國泰貪縱營私布政使于易簡亦縱情攬賄與國泰相埒等語葉佩蓀由山東按察使升任湖南布政使離山東不久巡撫布政如此婪賄不法斷難諉爲不知今特派尙書和珅左都御史劉墉等前往秉公據實查辦並帶同該御史錢澧前往斷無不水落石出之理著傳

諭葉佩蓀卽將伊從前在山東任內所有見聞國泰等如何貪縱營私之處逐一據實速奏若稍有徇隱將來和珅等審明果有其事業佩蓀何以對朕葉佩蓀在山東將及二年必有聞見且此事與伊無涉毋庸迴護若明白奏出朕亦不治其一向徇隱之罪所有錢糧摺著鈔寄閱看○辛未諭旗人外任年老有疾願回旗者仍留本身世職賞食全俸如勒令休致者本身雖有世職亦不准食俸著爲令○壬申諭 常雩大典朕親詣行禮凡在 壇執事諸臣胥應共矢恪恭 壇內一切禮器於朕未經齋宿之先禮部工部太常寺豫行派員周視均宜敬謹安設誠以敬 天大典小心昭事之忱大小臣工所當共懷乃本日朕行禮時見 壇內懸挂天鐙僅止二盞又更衣幄次所設坐褥亦不整齊 郊壇典禮朕親詣行禮尙如此草率不敬若遣官恭代更不可問矣其罪甚東華續錄

大非尋常錯誤止交部議處者可比工部堂官羅源漢等近因福隆安患病精神不能周到遂各委蛇袖手而派出司員等亦俱怠忽從事以致種種玩誤不可不嚴示懲儆福隆安若照常視事時遇有此等錯誤其處分必較諸人加倍姑念患病屬實加恩免其革職仍罰公俸十年所有工部尚書羅源漢侍郎諾穆親兼管太常寺事務禮部尚書德保侍郎德明俱著革去頂帶花翎仍革職從寬留任十年無過方准開復工部侍郎徐績由巡撫獲咎復用爲侍郎並不實心奉職其罪更重徐績著革職自備資斧前往和闐辦事更換達爾吉善達爾吉善俟徐績到後卽往喀什噶爾更換阿揚阿阿揚阿著前往葉爾羌更換復興回京至署理工部侍郎曹文埴署任未久又兼署戶兵兩部事務福長安昨日甫經兼署然亦均難辭咎著交部嚴加議處曹文埴不必兼署工部侍郎

事務至禮部太常寺堂官專司典禮乃以豫備天鎧等項係工部承辦慢不關心不過照例站班置身事外均失人臣敬事之義所有禮部尚書曹秀先禮部侍郎達椿莊存與錢載太常寺卿肅普洞阿倪承寬少卿扎郎阿孫士毅俱著一併交部嚴加議處至專司懸挂天鎧鋪設更衣幄次坐褥之工部司官並著該堂官查明革職發往伊犁效力贖罪其工部派出之查驗司官並著該堂官查明嚴參辦理以示懲儆夫敬天所以勸民龍見而雩典禮尤重朕古稀之年尙敬謹爲民請命乃大小諸臣疏忽若此不得不嚴加懲創不能以己化人實益慚懣將此通諭中外知之○諭杜玉林前於刑部侍郎任內因審辦案件有心曲庇故依部議降調但其材尙可用著加恩補授工部侍郎仍兼刑部侍郎上行走帶革職留任八年無過方准開復○己卯諭昨御史錢澧參奏山東

巡撫國泰布政使于易簡貪縱營私勒派所屬州縣以致厯城等處倉庫多有虧空各款蹟一摺特派尙書和珅左都御史劉墉並帶同御史錢澧馳赴山東省城嚴查辦理今據和珅等奏先將厯城縣庫盤查查出該縣知縣郭德平虧空銀四萬兩有那移掩飾之弊並詢問國泰任意婪索各屬員盈千累萬各款蹟亦俱承認俱係調任漳州府前任濟南府知府馮埏經手從前係呂爾昌經手又于易簡身任藩司一任縣庫虧空扶同弊混甚至見巡撫時長跪回語卑鄙無恥其餘案內款蹟見在徹底嚴究等語國泰于易簡呂爾昌馮埏郭德平均著革職拏問交和珅劉墉嚴切詢究定擬並著薩載派員將呂爾昌迅速解往山東歸案辦理所有山東巡撫員缺著明興補授卽赴山東新任接印辦事俟此案結後再赴熱河陛見請訓明興未到之前著諾穆親暫行署理直隸布

政使員缺著陝西布政使祥鼎調補所遺員缺著西安糧道剛薩

布署理○以孫士毅爲山東布政使

出太常寺少卿遷

陳淮爲安徽按察

使

由浙江

○庚辰諭軍機大臣等昨和珅查奏國泰于易簡一案

已降旨將國泰等革職拏問傳諭和珅等遵照研訊矣國泰此案

卽勒派通省屬員婪索銀八萬兩從前不知凡幾較之李侍堯在

滇省索取礦廠餘息者其罪較重且此銀數乃據馮瑛呈出本年

經手之件其從前呂爾昌經手者又有若干務須逐一根究不得

將就了事至于易簡前據錢澧奏自上年入覲回任之後自謂於

國泰有保奏之力遂亦縱情攬賄與國泰相埒等語果如所奏得

贓屬實是竟欺君罔上以濟其婪索之私其罪更浮於國泰自應

卽行正法若無其事止於畏懼巡撫不能據實參奏甚至長跪回

語乃其人品卑鄙不堪較之國泰勒派各屬者情節則稍輕矣此

處乃于易簡生死所關必使案情明晰證據確鑿方成信讞此事
在省各官均可逐一體問至錢澧既有此奏其聞之何人有何證
據自必確有指陳實蹟若止稱風聞言事又因國泰于易簡見已
革審問罪卽可完事不欲更爲已甚則大不可試思伊所奏于易
簡若實則罪應斬決若所奏不實則錢澧之不是爲何如乎朕於
辦理庶政一秉大中至正如此不爲已甚則可若內外大小臣工
不據實秉公亦託言不爲已甚可乎總之此案惟準情定罪明白
允當有則有無則無朕不肯曲庇國泰于易簡又豈肯枉屈國泰
于易簡乎著和珅等將此傳諭錢澧令其與于易簡質對明確據
實覆奏不可顛預混過作和事老人也至昨所奏見在盤查歷城
縣庫虧空銀四萬兩因銀色不對查出那移掩飾之弊此事前經
而諭和珅劉墉等今果不出朕之所料其餘錢澧指參之三州縣

恐亦不免有此等情弊務須詳悉查明水落石出不可因歷城已
經辦出不加詳細盤驗任其蒙混掩飾此三處和珅劉墉卽不能
親往或諾穆親明興錢漣等均可分投往查或令梁肯堂同軍機
司員赴彼詳查以服錢漣之心至通省虧空人數眾多雖與甘肅
上下通同一氣公然冒賑殃民者有閒然較之直隸各處因辦差
致有短缺者不同如果各州縣自知畏法不敢以官項爲結歡上
司之資何以致有虧空今朕格外施恩不欲復興大獄然不可不
徹底詳查予以限期令其上緊彌補儻有因此次從寬仍復任意
延宕不卽抵補者卽當嚴參治罪惟在新任巡撫明興率同新任
藩司孫士毅仰體朕意妥協辦理又梁肯堂見因欽差嚴詢始供
出于易簡見巡撫特長跪無恥此等情節若梁肯堂日久恐亦所
不免設果伊守正不阿豈有到任數月於國泰種種貪縱不法全

不聞見之理何以不行據實奏聞和珅等卽以此問之梁肯堂令其自行明白據實覆奏又和珅劉墉等昨所奏摺內有于易簡稱國奉聞有欽差過境恐有盤查等語此事必有人與信今日傳詢國霖據稱伊母於前月二十五日起身前往山東恐途中聞有欽差之信不能放心是以於初四日遣家人套兒前往並言並非與國泰送信套兒見在山東可以確訊等語此事不可不嚴行訊究國霖遣人前往何以不先不後亦於初四日出京顯然通知國泰令其豫爲地步著和珅等將套兒嚴切訊問究竟如何遣伊送信並於何日到東省之處詳悉具奏此案國泰自應按律定擬斬候于易簡有無婪贓情節出入罪關立決著和珅等一秉天良不得絲毫含混畸輕畸重朕於辦理庶務必期真知灼見從不肯調停遷就爲和事老人之見劉墉向在外任或未能深悉和珅日侍禁

廷豈得諉爲不知將此傳諭和珅劉墉等令其悉心詳細辦理完結後再令和珅押帶國泰于易簡來京若案情未明卽於朕啓鑾後趕赴熱河亦不爲遲至明興昨諭令卽由保定星馳前赴山東省接篆任事所有節次所降諭旨並和珅等奏摺夾片著一併鈔寄明興閱看以便遵照辦理○辛巳 上閱火器營兵○改譯遼金元三史告成 御製序曰改譯遼金元三史成司事者以序請史無序例也齊梁陳書及後五代乃有序蓋出於宋臣修史者矧爲之飾例也亦足觀其政之不綱而事之紛繁也若今三史之請序將比於孰乎曰彼之序皆序其事而此之序乃序其言則不可以齊梁等比之矣序其言亦非爲之修辭飾說乃改譯漢文譯其國語之譌誤者至於其國制度之理亂君臣之得失未嘗一字易蓋史者信也所以傳萬世垂法戒彼其時之史或已不能保其必

信數百年之後無庸爲之修飾且改譯者不過正其謬誤之語而其舊史之布天下者自在也讀史者執舊簡而證以新書則可知語之異而事之同則此序之不可不作乃所以明吾志也夫春秋一字之褒貶示聖人大公至正之心若遼金元三國之譯漢文則出於秦越人視肥瘠者之手性情各別語言不通而又有謬寫咀斥之意存焉此豈春秋一字褒貶之爲哉向於改譯三史之旨及同文韻統熱河志諸序已屢言之茲不復贅夫遼金雖稱帝究屬偏安元雖一統而主中華者纔八十年其時漢人之爲臣僕者心意終未泯洽我國家承天庥命建極垂統至於今百四十年矣漢人之爲臣僕者自其高曾逮將五世性情無所不通語言無所不曉且今之纂修諸臣卽有善通清書兼習諸國字之人則茲三史必當及此時而改譯其謬誤者是則吾於遼金元三代實厚有

造而慰焉雖然是造非吾造乃天造我國家重熙累洽而後得

此則所以祈天永命日慎一日之忱惟益兢兢懼乃勝於慰焉

云耳○壬午諭凡陣亡者給與世職仍賞恩騎尉世襲罔替其傷

亡者不必給與著爲令○實授圖薩布陝西布政使○癸未諭昨

於養心殿存貯各書內檢有明朝宮史一書其中分段敘述宮殿

樓臺及四時服食宴樂並內監職掌宮闈瑣屑之事卷首稱蘆城

赤隱呂悲校次其文義猥鄙本無足觀蓋明季寺人所爲原不堪

採登冊府特是有明一代批政多端總因閹寺擅權交通執政如

王振劉瑾魏忠賢之流俱以司禮監秉筆生殺予奪任所欲爲遂

致阿柄下移乾綱不振每閱明代宦官流毒事蹟殊堪痛恨卽如

此書中所稱司禮監掌印秉筆等竟有秩尊視元輔權重視總憲

之語以朝廷大政付之刑餘俾若輩得以妄竊國柄奔走天下卒

致流寇四起社稷爲墟伊誰之咎乎著將此書交總裁等照依原本鈔入四庫全書以見前明之敗亡實由於宮監之肆橫則其書不足錄而考鏡得失未始不可藉此以爲千百世殷鑒並將此旨錄冠簡端○乙酉諭軍機大臣等據和珅等奏國泰勒派屬員于易簡尙無婪索各情節一摺所奏俱已明晰摺內所稱國泰供呂爾昌前任首府時代辦物件並各州縣幫費俱係呂爾昌經手等語已節次傳諭薩載將呂爾昌毋庸解往東省卽迅速押解來京質審矣至于易簡有無婪索屬員銀兩一節旣據詢問眾人並夾訊于易簡之管門家人堅供實無贓據惟年節收受屬員水禮細段等物傳訊錢禮面質亦得之傳聞不能指實各等語看來情節不過如此國泰係小有才之人其居心巧詐因于易簡已經保奏不肯因此假之詞色致通省屬員不怕巡撫使藩司得分其權勢

所以故爲嚴厲不給顏面且明知于易簡已經保奏不敢復參轉得肆行無忌恣情婪索而于易簡實係庸懦卑鄙不堪之人甘心隱忍曲意逢迎是以通省屬員共相鄙薄不肯送給銀兩所奏各供自係實情此案大槩已有根據不過如此和珅即可一面定案奏聞一面押帶國泰于易簡來京其呂爾昌亦可於五月初到京當面質對至錢澧所奏章邱東平益都等三州縣自應與歷城一律徹底清查不可顛預了事著劉墉諾穆親明興親往盤查實在有無虧空並將錢澧留於東省不妨令其同查俟查明三州縣後一同回京錢澧所參國泰款蹟已實至于易簡攫賄證據何以不能指出若知而不言是既託名正直而又欲爲人存留地步調停將就亦屬非是今旣眾供于易簡雖未收受銀兩而水禮綉段亦屬不應收受則所奏尙非無因朕亦不加深究至指參之三州縣

虧空必應逐一嚴查務使有無虛實毫無隱遁方成信諫至通省
州縣之虧空人數眾多且出自國帑之抑勒朕實不忍似甘省之
復興大獄著明興詳查妥辦酌量輕重與以二三年之限令其自
行彌補此係朕格外施恩若眾人不知感知懼仍復因循延宕是
伊等自取重戾不可復寬著明興嚴參按律從重治罪此時明興
係新任巡撫毫無瞻顧自當仰體朕意悉心妥辦也至國霖遣家
人套兒送信一節已將國霖革職拏問交軍機大臣會同刑部嚴
訊自得實情將此由六百里發往並諭諾穆親明興知之○丁亥
上閱健銳營兵○己丑大學士三寶等議覆欽差大學士公阿
桂等奏祥符八堡十六堡張家油房曲家樓等處屢次漫溢灘面
淤高且無可別開引河之地其自曲家樓一帶經上年異漲後衝
成溝槽坑坎縱橫無數難以施工相度地勢惟南隄外尚可更改

遷移當於青龍岡池上南岸隄內履勘測量自蘭陽三堡起向東地勢就下較隄外大河水面低至三四尺不等若比河唇灘面則低一丈五六尺至二丈不等自此至考城商邱等汛共一百七十七餘里大率相同見擬於相距南隄十丈外建築大隄一道又前次南岸漫水所過本有沿隄舊河形再間段挑深數尺引河一道俾得就下查此兩項工程計長一百六十餘里工大費繁非四五月之久不能竣事俟渠已挑成隄築數尺後卽於蘭陽三堡老隄創挖寬深缺口導水進內由引渠下注從商邱七堡出隄歸入正河大溜勢必全掣向東下歸故道入海其曲家樓漫口自可堵閉此事一成可望數年無患至隄內民田廬舍原不能無礙且考城一縣亦須遷移避水臣等先期出示曉諭妥爲籌辦保護安全小民自必樂從等語應如所奏行再臣嵇璜更有請者南岸蘭陽三堡

建隄開渠通盤籌畫實於事勢恰當惟是大汛將屆將來伏秋盛漲之時上游險工頗多設其時大溜南趨或歸中泓情形又有變更則青龍岡漫口堵築尤可不費人力况值大雨時行之際築隄挑河均不能不稍稽時日或俟秋汛水退時再行開工似無趕辦不及之處報可○庚寅諭軍機大臣等昨據阿桂等奏南岸築隄改渠一招批交大學士九卿議奏今日復召見大學士尙書與軍機大臣等面降諭旨詢問見辦河工除築隄改渠之外是否別有長策僉稱青龍岡壩工屢築未就自應於南岸改辦卽目前形勢而論不得不如阿桂所奏辦理又據嵇璜奏請俟白露過後秋汛水退時再行施工等語河工乃國家大事關係民生不獨朕日夜焦勞凡在廷大臣均應盡心籌慮以期有裨國是嵇璜此奏亦有所見其是是否可以待至八月後施工不致趕辦不及之處著傳諭

阿桂等再行通盤籌據實具奏至青龍岡壩工見在既不能堵合其所存口門三十餘丈務須保護完固不得續有塌失方爲妥善總之此事朕毫無成見惟期於民生實有裨益阿桂等昨所奏蘭陽三堡建隄政河卽係朕前旨所指之池南一帶另籌去路惟前旨係通論大勢未嘗身親履勘目擊情形今覽所奏圖說阿桂等旣經親勘籌酌得宜飭下廷議眾謀僉同自應照所奏辦理至嵇璜所稱緩至秋閒開工之處亦爲斟酌事勢慎重要工起見阿桂等身親其事見聞真確果否可行候阿桂等奏到再降諭旨所有大學士九卿奏摺同此旨由六百里發往傳諭知之○辛卯諭從前公阿勒景阿在散秩大臣上因骸疾不甚當差經朕解退伊散秩大臣令其在侍衛上行走阿勒景阿卽當感激朕恩在侍衛差使上奮勉行走今又將及五月並未當差實屬不堪造就有負

朕恩阿勒景阿著革去公爵作爲藍翎侍衛發往伊犁效力贖罪
此公爵交該旗照例辦理○壬辰協辦大學士吏部尙書蔡新乞
假允之以劉墉署吏部尙書○諭軍機大臣會同英廉等將李侍
堯奏甘省捏災冒賑案內見在擬斬監候之閔鵠元等十七犯續
行查出任內虧缺銀糧草束等項覈擬具奏請旨卽行正法一摺
此案閔鵠元等十七犯於甘省歷年災賑項下婪得多贓數至盈
千累萬上年辦理通案人犯時因擬入斬決人數眾多不得不略
爲區別而該犯等假冒銀數亦尙在二萬兩以下是以姑從寬改
爲斬候令刑部存記入於今年秋審情實臨期再行請旨朕於辦
理庶務從不爲已甚如該犯等情節有一綫可原者尙欲加恩曲
宥今據李侍堯續行查奏該犯等任內各有虧缺銀糧草束各項
錢糧多者至五萬九千餘兩卽至少者亦有數千餘兩不等則是

於捏災冒賑本罪之外又復任意侵欺毫無顧忌多一虧空罪名實爲從來所未有此而不辦何以懲貪黷而申國憲閔鵠元等十一犯統計前後侵虧銀數均已在二萬兩以上罪實無可復追閔鵠元杜耕書楊有澳覺羅福明林昂霄王璠顧汝衡墨爾更額趙元德龐樸沈泰均著卽行處斬其董熙等六犯雖依議斬決亦屬罪所應得但其冒賑並虧空銀兩數計尙在二萬兩以下董熙丁愈華廷颺章汝柝李弼葉觀海俱著從寬改爲應斬監候秋後處決俟本年朝審句到時刑部請旨辦理近年侵貪案件屢經敗露如王直望一案甫經懲創今又有山東國泰之勒派屬員婪索多贓而屬員中亦有虧空者豈水懦民玩遂致僥倖身試懲不畏法者多耶所有閔鵠元等著派胡季堂福長安景熠前往監視行刑卽將此旨宣諭該犯等使知情真罪富實由自取將此案分別辦

理緣由通諭中外知之○諭阿勒景阿公爵係 皇祖妣孝誠仁
皇后初封承恩公爵卽獲重罪不惟不可削除在朕觀之亦屬不
忍皇帝始封之后及誕育皇帝之后所封承恩公爵非其餘所封
承恩公爵可比卽其人獲罪深重革去公爵亦不應削除自應於
別支子孫內揀選承襲著軍機大臣及該旗敬錄此旨億萬年永
遠遵行外其善保前因打死家人革去公爵今已悔過效力多年
著加恩將此公爵仍令善保承襲善保務感朕恩奮勉行走不可
仍蹈前轍任意乖張○甲午諭工部尙書羅源漢年力已衰難以
供職著加恩給還頂帶以原品休致所有工部尙書員缺著劉墉
補授仍兼署吏部尙書管國子監事務其都察院左都御史員缺
著王杰補授彭元瑞著調補吏部侍郎曹文植著調補戶部侍郎
所遺兵部侍郎員缺著紀昀補授內閣學士員缺著李綬補授○

是月湖南布政使葉佩蓀遵旨覆奏臣於乾隆四十五年到山東臬司任見巡撫國泰恃才縱性藩司于易簡曲意順從頗聞外議紛紛皆以國泰遇事吹求意在婪索且升調補缺槩不照例惟交于易簡辦理蹤迹又極祕密是以輿論傳有曖昧營私之事臣在東省二年既有見聞乃竟緘默不舉請嚴加治罪以爲畏葸徇隱者戒得旨該部嚴察議奏○署山東布政使按察使梁肯堂奏兩次奉諭詢問國泰于易簡事臣上年到山東臬司任卽聞撫臣國泰貪縱營私留心察訪知勒派銀兩事係首府馮埏經手是以於欽差到省時卽行指出至于易簡長跪回話會當面勸止于易簡不從臣實不敢效尤但既有見聞未能據實直陳殊屬昏懦請將臣從重治罪得旨該部嚴察議奏

五月丁酉朔諭吏部議奏前任山東按察使葉佩蓀及見任山東

按察使梁肯堂與國泰于易簡同城密邇並未將國泰等縱情婪賄情節據實參奏俱請旨革職交刑部治罪等語藩臬與督撫最爲切近遇事稟承商推原不得干預督撫之權然督撫果有乖張任性及婪索屬員贓蹟顯著之事平日見聞旣確自應據實入告若竟似此徇隱不言亦安用此藩臬爲耶葉佩蓀等卽照部議革職治罪亦不爲過第念葉佩蓀梁肯堂較之于易簡之卑鄙無恥朕當面問伊伊尙甘爲掩飾欺君者尙屬有聞但伊二人在山東臬司任內久暫亦有不同茲特加恩免其革職治罪仍分別降調以示平允葉佩蓀在任將及二年著加恩以知府降補梁肯堂僅止數月加恩以道員降補朕於諸臣黜陟一秉大公從無屈抑該員等經此番加恩甄錄之後尤當知感知愧勉力報效以贖前愆將此通諭知之○諭據李侍堯奏查明臬蘭等三十四廳州縣虧

短倉庫確數共銀八十八萬八千九百九十餘兩又虧空倉糧七十四萬一百一十餘石及草束四百五萬一千有零俱係歷任州縣侵虧轉相容隱接收各上司因循不辦捏結保題釀成鉅弊請自乾隆四十年以前溯至乾隆二十年歷任州縣道府藩司督撫照伊等任內虧空四十二萬之數著落加倍分賠如有無力完繳者卽攤入通案各員名下代賠等語倉庫正項銀兩乃敢任意侵欺卽令加倍賠補亦所應得但念歷年已久各州縣展轉接收較之折捐冒賑味良舞弊者尙屬有間其濫行出結保題之各上司咎止失察著加恩將虧空四十二萬之數照依原單按其任任久暫照股分賠毋庸加倍賠補至該督所稱其餘尙有八十二萬餘兩未便竟歸無著請於見任總督及司道府廳州縣各員養廉內攤扣三成陸續歸補等語甘省積弊相仍爲從來未有之奇事此

等劣員既經冒賑殃民又復侵虧正帑實屬罪無可逭昨已將閔
鴻元等交軍機大臣會同英廉等詳加覈奏降旨分別辦理至李
侍堯福崧等辦理此案徹底清查尙屬實心卽見在道府及州縣
多係新任若令攤扣養廉辦公未免竭蹶且恐將來轉有藉詞賠
累復致虧缺之弊並著一體加恩免其分賠此次寬免之後若再
有虧短一經查出斷不爲之曲貸也該督撫仍當不時查察毋得
稍有徇隱將此通諭知之○諭烏嚕木齊採買糧價各州縣任意
侵蝕一案今據喀爾阿查明奏此案奎林雖未似索諾木策凌有
勒索屬員禮物之事伊在烏嚕木齊都統任亦幾一年矣明亮甫
經到任卽能查明參奏伊何竟無見聞若論其罪應將伊公爵竟
行削除但念此承恩公爵並非奎林本身軍功所得乃 孝賢皇
后之承恩公爵也與 皇祖妣孝誠仁皇后所封公爵無異斷不

可削除以襲替公之例而論明亮係伊家長房應令其承襲但伊係伯爵此案又係伊查辦者自不應令其承襲福隆安一支亦有公爵 孝賢皇后昆弟內惟餘傳玉一人又係奎林明亮福隆安等長輩所有奎林革退之承恩公爵著加恩令傳玉承襲○以李封爲湖南布政使王果爲浙江按察使由溫處道遷○以馮晉祚爲山東按察使由福建道遷○庚子諭朕恭閱 皇祖實錄所載埽除吳逆平定川陝事蹟因取張勇趙良棟王進寶三人國史列傳詳加披覽其功績實有不可沒者當吳逆煽亂川陝兩省提鎮王輔臣吳之茂等相率從賊維時西陲告警張勇以雲南提督調回甘肅授爲靖逆將軍勇躬履行間殫心籌畫攻取平涼底定秦隴其間收復洮河諸郡及舉發僞札執斬來使諸事居然有古名將風而趙良棟之授爲甯夏提督卽係張勇所薦又王進寶亦曾隸勇麾下

兩人提兵轉戰同心效力趙良棟首先建議直取成都王進寶戡
定保甯殲擒渠帥其削平恢復之勳亦不可泯厥後張勇封侯趙
良棟王進寶僅得子爵蓋緣兩人各懷私忿互相攻訐較之張勇
之勤勞懋著始終無過者實遜然兩人之功究足以掩其過今百
年論定睦念成勞趙良棟王進寶宜量加追敘前於乾隆三十二
年特降恩旨令張勇等子孫世襲罔替張勇本侯爵其元孫張承
勳承襲因曠班革去散秩大臣在三等侍衛上行走茲特加恩復
還散秩大臣照舊供職至進取雲南恢復成都趙良棟之功爲最
原封一等子著晉封一等伯王進寶原封三等子著晉封爲一等
子仍准世襲罔替並交該督撫查明趙良棟王進寶見應襲職子
孫送部引見候朕酌量錄用以示優眷夫兵可百年不用不可一
日不備國家承平日久每溯前勳爰思將帥如張勇趙良棟王進

寶諸人將材武略獨出冠時名炳旂常賞延苗裔凡在戎行者尙其益勵趙桓以副干城腹心之寄將此通諭中外知之○諭昨因國霖遣家人往伊兄國泰任所將國霖革職已交刑部今審訊得並無與國泰寄信情弊且國泰之犯罪原無關於國霖之寄信與否著加恩賞給國霖三等侍衛在大門上行走贖罪○辛丑定哈拉巴爾噶遜新建城名曰嘉德城門東曰寅輝西曰仰極南曰成順北曰遵道○戊申 上啓鑾秋獮木蘭○免經過地方本年額賦十分之三○辛亥直隸總督鄭大進奏保定省城南有九龍河一道發源於望都縣之九龍泉由清苑之張登鎮安州之依城河新安之長流河至任邱之十一橋入淀該州縣等旱潦藉以蓄洩商販由此往來比年來日漸淤淺亟宜挑挖至河身高低不一全賴開座以司啓閉九龍河自望都縣東門外響閘以下僅設殷家

營高嶺村二閘自殷家營至清苑縣境縣長六十餘里河水迅駛
必須添建閘座清苑境內於再村鄧村營頭村添建三座又該縣
自陽城村至張登鎮原有石橋十座俱坍塌應修至安州新安任
邱河身間有沙淤均應一律疏濬得旨如所議行○甲寅閩浙總
督兼管浙江巡撫陳輝祖奏仁和西塘頭圍爲江海交接處向無
工程北岸接連嘉湖二府水道遞相貫輸每遇江水挾湖而來或
汛期盛大山水陡發該地被汕蓄爲尤甚因思頭圍挺出海灘甚
漲若順江海往來之勢於溜行直注處開切通流則沙淤自無停
積當卽遴選幹員開挖引河七百五十丈寬二十丈深七尺適值
山水漲發大溜直趨引河兩岸衝激原寬二十丈者今寬九十餘
丈原深七尺者今已深二三丈以外絕無停淤至南岸蕭山縣之
英家灣該處形勢背灣漸有停淤臣已委員查勘另由蕭山縣之

義橋轉運赴工此係由內河經行較海道更爲平穩得旨可嘉之至有旨交部議敘○甲寅 上駐蹕避暑山莊○乙卯諭據陳輝祖奏海塘頭圍開濬引河江湖暢順一摺所辦甚合機宜可嘉之至海塘南岸淤沙縣互從前歷辦引河迄無成效陳輝祖能督率司道等悉心講論辦理此段工程於南坍北漲之機切中窾要將來魚鱗石工告竣可以永期鞏固此事陳輝祖所見既確不待奏聞卽督同屬員實力妥辦在工人員亦皆能協力襄事均應嘉獎陳輝祖著復還總督原品頂帶其承辦此工之藩司盛佳以下各官並著交部議敘所有開河工費仍准作正開銷至富勒渾前因王亶望案內降爲三品職銜加恩授河南巡撫今兩載以來辦理豫工備夫集料諸事不辭勞瘁及李侍堯前經獲罪加恩以三品職銜署理陝甘總督莅任後於該省折收冒賑全案徹底查辦不

避嫌忽見在通省積弊漸清不負朕棄瑕錄用之恩富勒渾李侍
堯俱著復還見任品級頂帶朕於諸臣功罪黜陟一秉至公不存
絲毫成見內外臣工宜各知懲勸努力辦公毋負朕任使之意並
將此通諭中外知之○丁巳命直隸承德府平糶

六月丁卯調汪承霈爲工部右侍郎杜玉林爲刑部右侍郎○壬
申刑部議伊犁將軍伊勒圖奏從前擬流改發伊犁之原任典史
要俊卿十年期滿例應回籍得旨此案要俊卿一犯本擬按律杖
流因該犯圖避處分誣稟上司居心險詐情節較重是以從重改
發伊犁充當苦差今以年滿釋回則較原擬流罪不准限年回籍
者轉輕是雖嚴而實寬殊不足以昭平允嗣後凡遇此等情節可
惡發往新疆之犯俟年滿時仍將該犯發交應配地方定地安插
遇有恩赦再令回籍著爲令所有要俊卿一犯卽照此例行○丙

子諭前據大學士九卿等奏議國泰于易簡等貪婪欺飾各款請旨卽行正法曾經降旨俟呂爾昌解到歸案質訊明確再降諭旨茲據留京辦事王大臣等審訊呂爾昌等從前在濟南府任內聽從國泰勒索並代屬員李鴻等彙送金銀物件屬實一併定擬具奏前來此案國泰貪縱營私勒索各屬員財物以肥囊橐實屬目無法紀非李侍堯之僅收受礦課餘息者可比其罪自難寬貸但念其所得贓私尙與枉法鬻爵者有間國泰著從寬改爲應斬監候秋後處決于易簡身任藩司受恩最爲深重明知國泰種種不法款蹟旣不行據實參奏復敢於朕前欺隱其罪較重但國泰旣邀寬典于易簡亦著一併從寬改爲應斬監候秋候處決○丁丑諭朕前因奎林未能查出烏魯木齊之事令其明白回奏今據覆奏伊素性糊塗等語奎林並非糊塗特欲消弭此事耳奎林係

孝賢皇后之姪與福隆安明亮俱屬一體福隆安素與伊不合朕所深知至在金川軍營明亮係伊本隊將軍他人俱稱奎林臨陣勇往領兵進退皆合機宜而明亮並未保題看來弟兄平素不睦顯然但此案若無影響明亮豈能捏造茲查明俱已屬實自非明亮與伊不合尋事查辦者矣且和珅去歲自甘省回京奏稱奎林可用爲督撫朕原因其人去得授爲烏嚕木齊都統今詢問彼處有此等事件伊何故不能查辦據和珅奏稱奎林之意以爲伊在烏嚕木齊數年後所有虧空可以漸次彌補可免無事等語福隆安亦如此奏是奎林實屬負恩昧良昨朕因治其辦理不善之罪將所有承恩公爵開去已屬從寬奎林係內廷行走之人朕辦理萬幾一秉至公伊所深知孰敢誣陷人耶烏嚕木齊之事奎林竟欲消弭殊屬非是著傳諭奎林令其自行議罪具奏嗣後伊若不

知朕恩遇事仍不實心辦理朕必將伊從重治罪但奎林臨陣遇
往進退有方而辦事每每昏慣朕所不解著傳諭令其據實明白
回奏○己卯諭楊魁歷任巡撫有年頗著勤勞前聞患病卽降旨
令其回籍調理方冀速痊以資倚任今聞在途溘逝深爲軫惜所
有應得卹典著該部察例具奏○壬午諭據閔鶚元奏原任陝西
白水縣知縣王希伊病痊驗看精力漸衰請改補教職等因一摺
知縣爲親民之官一切刑名錢穀經手事件均關緊要自不便以
年力就衰之人聽其濫竽貽誤閔鶚元所奏甚是督撫身任封疆
察吏是其專責豈可少存瞻顧卽如吏部昨日參奏選授江蘇沛
縣知縣吳封因該縣見被水災託病在籍呈請開缺顯係有心規
避請旨革職留工效力一摺業經明降諭旨將吳封從重改發烏
魯木齊以爲味良規避者戒吏部辦理此案甚屬公當並非堂官

攬權故示風厲者可比國家綱紀肅清部院臣工儻有挾私蒙混
舉劾不公者斷不能逃朕洞鑒此案實係應行糾參內而部院堂
官外而督撫均應如此留心方合大臣靖共任事之義至譚尙忠
本不過謹飭供職之人因其在藩臬中資格稍深是以授爲巡撫
並非因其才能辦事優加升擢今甫任巡撫卽徇情邀譽安望其
能整飭吏治耶蓋吳封呈請開缺適當沛縣見被水災急須印官
到任拊循辦理一切乃託病遷延有心規避此事之顯而易見者
譚尙忠如能將該員立行參奏朕必嘉其公正乃視爲尋常事件
全不留心體察卽此一端其不勝任可知設譚尙忠更有別項徇
私情弊朕必重治其罪又不特交部嚴加議處已也除此案俟吏
部照例議處另降諭旨外譚尙忠豈可復留巡撫之任所有安徽
巡撫員缺著富躬補授廣西布政使員缺著瑞齡調補江蘇布政

使員缺著伊星阿補授譚尙忠卽著加恩降補福建按察使以觀後效將此通諭中外知之○庚寅諭據富綱等奏探明緬酋更換情形一摺內據騰越總兵許世亨等稟稱探得緬酋贅角牙被老酋獲藉牙之孫孟魯乘閒殺害旋有獲藉牙四子孟隕復將孟魯殺死自立爲酋凡惜駁贅角牙信用之頭目土司盡行調回其所用大頭目悉係獲藉牙舊人等語緬甸自乾隆十五年以後獲藉牙占踞爲酋伊子惜駁繼立自外生成首先抗逆其子贅角牙世濟其惡反覆不常今孟隕自立爲酋骨肉相殘展轉襲殺緬酋惡逆之報自爲天理所不容但伊等穴中之鬪不值煩我天朝興師致討况從前首禍係惜駁贅角牙父子彼時因緬地瘴癘我兵疾疫頻仍不能久駐又值該酋等畏罪哀懇朕體上天好生之德許其罷兵已歷有年所今該酋等並不敢侵擾邊關若遽因其爭立

內訌興問罪之師不特師出無名且轉似爲惡逆之情駁父子報復尤屬不成事體況得其地不足守非如新疆伊犁等處西師成功後可永遠耕屯鞏固金湯者可比此事竟可無庸辦理富綱等當仍遵前旨示以鎮靜不可稍涉張皇朕非因年老畏事意存安逸此時自揣精力軍書午夜儘可耐勞若果當問罪興師如去歲蘇四十三之事何嘗置之不辦又何嘗不早夜籌畫耶况軍事在於知己知彼卽朕欲辦理此事亦不付之富綱也但此事實不值辦理卽阿桂熟悉彼處情形素能曉事亦必與朕所見相同著傳諭阿桂令其據實覆奏外並傳諭富綱等此事非富綱所能辦凡事須知己知彼富綱於無事時僅堪自守伊亦當有自知之明不可存便宜之心海祿亦不可存見長之意但須鎮靜謹守邊防爲是此時亦不可遣人至阿瓦探信富綱亦不必至永昌等處致露

張皇若孟隕於此時因將贅角牙戕害仍恭順天朝虔修職貢遣人叩關哀懇自應據情入奏准其輸誠於事體亦順卽或該酋等觀望不前亦可置之化外但當嚴守邊界如此時有贅角牙頭人因彼處不能容身竄入內地若人數眾多卽另爲安插遠處不可留於滇省若人數無多及無關緊要之人仍可遣還總之此事權其輕重緬甸不但水土非宜况從前旣允其納款乞宥降旨赦其前罪今又乘其危亂出師進討殊非天朝堂堂正正之義朕籌之已熟並令大學士九卿等公同詳議具奏將此傳諭富綱等知之並將遵旨無庸辦理緣由迅速馳奏尋阿桂等奏緬酋比年以來並不敢侵擾邊圉今若乘其內鬩與師問罪實非所宜我皇上容寬宸謨不遺纖悉從前平定兩金川去年殲除回逆斷不肯以應辦之事置之不問今此事實不值煩我兵威臣阿桂曾在雲南

情形較爲諳悉卽臣三寶等熟思審計無不欽服睿慮之周密報聞又富綱奏臣奉諭卽飭各該將嚴守關隘鎮靜如常儻有贅角牙頭人竄入內地酌量安插遣還如新酋孟隕效貢叩關亦卽據情馳奏得旨以汝之材止可安分守己勿生妄想○辛卯諭朕閱國史館進呈諸臣列傳內原任刑部侍郎任克溥傳所載前後條陳各事宜若守令各官不能保舉得實士子以請託賄賂進身及宦戶恃勢攬收糧銀儒戶包免雜差據收額賦衙蠹投身要地攬賦最多並各省加派火耗苦累閭閻及派百姓養馬應夫或充里長遇有上司經臨豫備供應復有訟師羅織無辜牽累良民直省督撫大吏苛索屬員苞苴無厭等款所言皆關繫士習民風官方吏治實爲切中當時利弊是以 世祖章皇帝暨 聖祖仁皇帝俱降旨允准施行任克溥逮事 兩朝抒誠建白無愧直言謬

之臣國家承平百有餘年一切激清吏治整飭士風各政事經我
皇考宵旰勤求孜孜不倦益復治臻上理朕繼緒四十餘載迄
今年逾古稀雖日理萬幾而兢兢業業夙夜不遑但恐日久廢弛
見在民生是否尙有苦累內外大小官吏是否尙有作奸犯科未
經釐剔整頓如任克溥所稱諸弊者著大學士九卿科道及各直
省督撫直據所見據實奏聞所有任克溥條陳各款一併發鈔將
此通諭中外知之○甲午陝甘總督李侍堯奏據河州知州于鏗
稟請查照雍正年間河州二十四關設立鄉勇例編伍團練以重
邊防等因查鄉勇之設農忙歸業農隙操演倣古寓兵於農之法
其實半係游手無業之徒況河州所屬大半回民良莠溷雜難保
無借此爲名私製軍械糾結藏奸查該州鄉勇舊設五千人乃去
年逆匪攻搶河州任其滋擾彼時所稱鄉勇者何在可見有名無

實今事平之後因官禁私藏烏槍復指稱鄉勇名色冀得照舊存
留河州逼近撒拉爾難保無串通番回滋事之處况該處設鎮添
兵足資防範請將鄉勇盡行革除並將私藏禁械一體收銷得旨
是極汝實解事之人也

東華續錄

乾隆九十六

臣王先謙敬編

臣周潤蕃恭校

秋七月丙申朔諭軍機大臣等據李奉翰等奏直隸山東江南各省附近豫工各屬代雇民夫派員帶領來工指與工段卽令該省委員駐工督率人夫興挑等因一摺此項協濟人夫直隸山東等省其僉派押解小民不盡踴躍樂從朕從前早經見及屢次傳諭甚明而此次李奉翰韓鐸等摺內但知借資鄰省並未通盤籌畫以朕觀之其中實有礙難辦理情形以致嘵嘵不已轉若有互相推諉之意已於摺內詳晰批示矣李奉翰等應遵照節次諭旨務儘本省人夫召募雇用蓋開挑引河原因堵築漫口爲民田廬舍奠安之計乃驅率隔省不樂從之人夫押解赴工是欲利民而轉

以病民甚非朕軫恤窮黎廬念要工之意卽如直隸民夫修墊道路最爲熟習然設令畿輔民人修理他省道路卽有遷地弗能爲良之勢且不特此也古者八家同井同養公田此亦宜於古而不宜於今若用此法必致八家各顧其私互相觀望公田竟至荒蕪不治李奉翰等何未念及此乎再代雇之夫無論裹糧遠出不願前往者居多卽所奏直省派委官員令押帶民夫赴工分段承辦一切呼應不靈動多掣肘隔省差員豈能如本省屬員之畏上司卽李奉翰韓鐸等管理直省委員亦不能如本省屬員如臂指之相使也看來李奉翰韓鐸富勒渾等於此事工大任重竟至畏難茫無主見矣且河南之工富勒渾自當身任其事今貧民無地可耕者甚多豈一省之中不能得十數萬夫而必借資鄰省乎昨令阿桂起程赴工或順道由山東運河一帶查勘河湖形勢本日據

韓鐸等奏到緯道及糧艘北上情形俱屬安穩。看此光景，阿桂不必由東省查勘，應卽由京徑赴豫工督辦一切。日內卽酌定出京日期，一面起程，一面具奏至直省。見在雇備夫五千名，著傳諭鄭大進如此項人夫，尙未起身，卽可停止。如已起身前往，恐前派之員不足以資彈壓，卽派清河道永保並帶同幹練丞倅等官管領夫役前往幫辦一切。或尙得力，總之引河工程其創挖溝槽及隄工基址大局已定，卽眼前人夫不能十分齊集，就本處雇覓儘屬從容，亦毋庸借資鄰省。况前已降旨將開放之期寬限至霜降節，邊見在伏汛已過，秋汛將臨，設霜降時候所有開挑工程尙不能一律完竣，卽緩至冬閒甚或遲至明春桃汛以前開放一舉集事亦無不可。此等機宜，阿桂到彼會同李奉翰等悉心籌酌妥爲辦理。朕可稍紓座念。所有李奉翰等原摺並糧船催過濟甯一摺俱

著抄寄阿桂閱看並將此由六百里一併諭令鄭大進薩載李奉翰韓鐸富勒渾明興知之○癸卯諭國泰于易簡前在山東撫藩任內朋比營私國泰身任封疆勒派通省屬員婪索得贓數至累萬于易簡係大學士于敏中之弟加恩用爲藩司大員乃一味逢迎阿附及朕降旨令其來京面加詢問伊甘蹈欺罔不肯實言並令軍機大臣詳加開導究詰伊始終爲之庇護昨經御史錢澧參奏命和坤劉墉等前往查審贓私敗露依律問擬斬候復命大學士九卿等會覈請旨卽行正法維時以六月停刑從寬仍改爲應斬監候茲又據明興奏查辦山東各屬虧空竟至二百萬兩之多實堪駭異因命留京辦事王大臣等將明興查辦東省虧空奏摺令國泰于易簡閱看訊供具奏據國泰于易簡同供乾隆二十九年因辦理王倫逆案有豫備守城不准開銷之項各州縣因公那

移致有虧空等語王倫滋事之案辦理不及一月即使因公那移何至有二百萬兩之多况伊等身爲撫藩如果查係實在公用那移卽應據實奏明朕必降旨加恩准其報銷若係州縣藉詞侵冒亦應據實嚴參治罪乃國泰于易簡但知罔上行私通同舞弊而於屬員虧空帑項槩置不問其罪實與王亶望蔣全迪相埒卽立予棄市原所應得但尙有王倫一案藉詞卸罪較之王亶望等又可略寬一綫國泰于易簡著加恩賜令自盡派侍郎諾穆親前往宣旨監看並將此通諭中外知之○甲辰命續繕四庫全書三分度揚州文匯閣鎮江文宗閣杭州文瀾閣○己酉諭禮部具題本年八月十五日京師月食百官朝服齊集太常寺行救護禮一本雖係照例具題但日月薄蝕究非經行常度向來朕遇此等事皆於宮中素服拈香行救護禮百官齊集救護亦應素服將事以

合奏鼓之義嗣後如遇日月食雖當應穿朝服之期亦著用素服行禮著爲令○諭今年春閒因諫省青龍岡漫口合龍未就遣大學士阿桂之子乾清門侍衛阿爾達前往青海務窮河源告祭河神事竣復命並據按定南鍼繪圖具說呈覽據奏星宿海西南有一河名阿勒坦郭勒蒙古語阿勒坦卽黃金郭勒卽河也此河實係黃河上源其水色黃回旋三百餘里穿入星宿海自此合流至貴德堡水色全黃始名黃河又阿勒坦郭勒之西有巨石高數丈名阿勒坦噶達素齊老蒙古語噶達素北極星也齊老石也其崖壁黃赤色壁上爲天池池中流泉噴涌醞爲百道皆作金色入阿勒坦郭勒則眞黃河之上源也其所奏河源頗爲明晰從前康熙四十三年 皇祖命侍衛拉錫等往窮河源其時伊等但窮至星宿海卽指爲河源自彼回程覆奏而未窮至阿勒坦郭勒之黃

水尤未窮至阿勒坦噶達素齊老之真源是以 皇祖所降諭旨
並幾暇格物編星宿海一條亦但就拉錫等所奏以鄂敦他臘爲
河源也今旣考詢明確較前更加詳晰因賦河源詩一篇敘述原
委又因漢書河出昆侖之語考之於今昆侖當在回部中回部諸
水皆東注蒲昌海卽鹽澤也鹽澤之水入地伏流至青海始出而
大河之水獨黃非昆侖之水伏地至此出而挾星宿海諸水爲河
瀆而何濟水三伏三見此亦一證因於河源詩後復加案語爲之
決疑傳正嗣檢閱宋史河渠志有云河繞昆侖之南折而東復繞
昆侖之北諸語夫昆侖大山也河安能繞其南又繞其北此不待
辨而知其誣且昆侖在回部離此萬里誰能移此爲青海之河源
旣又細閱康熙年間拉錫所具圖於貴德之西有三支河名昆都
倫乃悟昆都倫者蒙古語謂橫也橫卽支河之謂此元時舊名謂

有三橫河入於河蓋蒙古以橫爲昆都倫卽回部所謂昆侖山者亦係橫嶺而修書者不解其故遂牽青海之昆都倫河爲回部之昆侖山耳旣解其疑不可不詳誌因復著讀宋史河渠志一篇茲更檢元史地理志有河源附錄一卷內稱漢使張騫道西域見二水交流發蔥嶺匯鹽澤伏流千里至積石而再出其所言與朕蒲昌海卽鹽澤之水入地伏流意頗合可見古人考證已有先得我心者按史記大宛傳云于闐之西水皆西流注西海其東水東流注鹽澤潛行地下其南則河源出焉河注中國漢書西域傳于闐國條下所引亦同而說未詳盡張騫旣至蒲昌海則或越過星宿海真至回部地方或回至星宿海而未尋至阿勒坦郭勒等處當日還奏必有奏牘或繪圖陳獻而司馬遷班固紀載弗爲備詳始末僅以數語了事致後人無從考證此作史者之略也然則武帝

紀所云昆侖爲河源本不誤特未詳伏流而出青海之阿勒坦噶達素而經星宿海爲河源耳至元世祖時遣使窮河源亦但言至尙海之星宿海見有泉百餘泓便指謂河源而不言其上有阿勒坦噶達素之黃水又上有蒲昌海之伏流則仍屬得半而止朕從前爲熱河考卽言河源自蔥嶺以東之和闐葉爾羌諸水潴爲蒲昌海卽鹽澤蒙古語謂之羅布諾爾伏流地中復出爲星宿海云云今覆閱史記漢書所紀河源爲之究極原委則張騫所窮正與今所考訂相合又豈可沒其探本討源之實乎所有兩漢迄今自正史以及各家河源辨證諸書允宜通行校閱訂是正訛編輯河源紀略一書著四庫館總裁督同總纂等悉心纂辦將御製河源詩文冠於卷端凡蒙古地名人名譯對漢音者均照改定正史詳晰校正無譌頒布刊刻並錄入四庫全書以昭傳信特諭 御製

河源詩曰惟嶽曰有五惟瀆曰有四四瀆河居一宏功贊天地金
 隄護九曲邇年每有事瓠子計已竭靈源致虔祭因遣侍衛往窮
 源命必至歸來新圖呈舊圖稱未備舊云星宿海便即河源是叶
 蒙古語鄂敦鄂敦星宿謂此固非差謫然河其南寄因更向西行
 溯洞川益遠色赤作黃金別流無敢廁詢其蒙古名曰阿坦郭勒
 叶阿坦謂黃金郭勒則河義更西得巨石詢蒙古名字阿坦噶達
 素北極星名意司水見道經不約今古契再上則赤壁壁端天池
 積叶醴泉作金色真源信無二山土胥金色更無林木翳東南流
 折北屈注三百里叶穿星宿海東色微淡以易東至貴德堡遂作
 純黃色叶向稱星宿源亦未大差致集林云有人見婦浣紗異張
 鸞支機石更述荆楚記或到星宿海傳奇偽統天一所生軒
 圖旨早示考訂誌其詳惟額安瀾賜御製河源按語曰按班固

漢書張騫傳天子使窮河源其山多玉石采來天子按古圖書名河所出山曰昆侖云而固贊又謂騫使大夏之後窮河源惡觀所謂昆侖者乎故言九州山川尙書近之於是鄧展遂謂河源出於積石是皆拘墟未見顏色之言蓋千古以上中國以外紀載已舛言語不通而欲定其確實何異北轅適越考元史始有星宿海之名而以爲河源元蒙古也鄂敦卽星宿彼時譌譯爲火敦則漢人不通蒙古語耳此爲近之今則更溯以上遂得真源然昆侖之語亦不爲無因蓋昆侖在今回部中回部諸水皆東注蒲昌海卽鹽澤也鹽澤之水皆入地伏流至青海始出則星宿海諸水皆是也而大河之源獨黃色爲靈異更在星宿海之上非昆侖之水伏地至此以出而挾星宿海諸水爲河瀆而何濟水三伏三見此亦一證矣獨漢書所云采玉則因昆侖出玉未免牽就詢之阿彌達則

稱河源皆土山無石無石安能有玉夫非精通蒙古語及漢書更問之親履其地之人率欲定此事體大而地遠理博之事不亦甚難乎於甚難而得決疑傳正亦一大快也 御製讀宋史河渠志曰予旣問之往祭河源之侍衛阿彌達明悉河源在星宿海之西亦旣繫之詩而按以語矣因取宋史河渠志觀之宋史元托克托等所修也以蒙古人言蒙古地名尙有踏舛失真者則以蒙古人不深明漢文宜其音韻弗合名不正而言不順以致紀載失實也其所譯哈喇海齊必勒呼蘭伊拉齊之類皆不合今蒙古語非不合也蒙古語猶是其音譯漢文則差也茲姑弗論獨所繞昆侖之南折而東又云復繞昆侖之北自貴德西甯之後云云貴德卽元之貴德州而今之河州之地也西甯則仍今西甯此其閒焉有所謂昆侖者乎夫昆侖自在回部離此將萬里誰能務於此爲河源

細究其義蓋修河渠志者或曾讀漢書武帝紀因牽強爲之辭不知以譌傳譌益增人不信耳既又細閱康熙年間拉錫所具圖於貴德之西有三支河其名昆都倫乃恍然大悟昆都倫者蒙古語謂橫也橫卽支河之謂此蓋元時之舊名謂有三橫河入於河而修書者不解其故遂闕入回部之昆命山以證漢武之事耳然蒙古謂山橫者曰昆都倫或張騫曾到回部之昆都倫以及蒲昌海鹽澤謂爲河源則是與予所云不約而同而要之究未明其入地伏流爲星宿海上之河源也旣解其疑不可以不詳誌如是則陶淵明所謂不求甚解者爲可行乎爲不可行乎 御製河源簡明

語曰予旣爲河源詩並按語繼讀宋史河渠志有文命輯河源紀略有諭茲以體大物博考今證古不無費辭雖彼此細勘事則明恐毫釐稍差義乃紊茲爲簡明之語庶因提要而便覽蓋河源究

以張騫所探蒲昌海鹽澤及漢武所定昆侖爲是雖山海經水經注皆略具其說山海經劉歆稱伯益所著本無所據水經注則桑欽鄠道元皆張騫後人實祖其說而廣之以至於煩文且昆侖在回部原出玉也獨未明揭伏流至青海於阿勒坦噶達素之天池而出耳歷唐宋以至元乃有鄂敦諾爾爲河源之語鄂敦爲蒙古語漢語卽星宿海也彼時雖未考至天池而中國之河源實由此頗見梗槩矣溯伏流以至蒲昌海鹽澤非河源而何星宿海亦鹽澤之伏流至青海而出爲清水黃河挾之以流始爲微淡後爲純黃是二水本一源至中國出地爲二色而終歸於一若夫曲折纖細則見近所爲詩文及紀略之書獨敘其簡明崖略如此○軍機大臣等奏一統志內甘肅之歸德所今改爲懷德所其西甯縣屬歸德所縣丞並歸德營遊擊應交吏兵二部均改爲貴德以昭畫

一報聞○壬子諭本日大學士九卿科道等將從前任克溥條陳諸弊會議具奏摺內稱見在綱紀肅清前代批政俱已革除淨盡惟在大小臣工實力奉行自不至有因循廢弛之弊此語朕疑信半焉亦惟日慎一日所其無逸耳至副都御史巴彥學有請更定科場詩論以杜關節以端士習之奏所言實爲深切時弊不虛朕降旨求言之意已依議行矣蓋詩題係朕所命且律句謹嚴難以揣摩若頭場詩文既不中選則二三場雖經文策問閒有可取亦不准復爲呈薦儻同考官仍蹈故轍監試官即可指名參處此亦防弊之一端巴彥學此奏殊可嘉尙又御史鄭徵摺內所稱論內易藏關節一款已於巴彥學摺內准行其餘各款仍著該部議奏朕宵旰勤求孜孜不倦凡有益於政治官方民生國計者莫不虛衷採納卽今年逾古稀每歲臨幸山莊藉舉秋獮大典亦不肯少

自暇逸內外大小臣工皆當仰體朕懷悉心講度勿謂已治已安稍萌因循懈弛之意卽如巴彥學等條陳諸事其中頗有切中時弊者我君臣當交相儆惕期於弊絕風清以副朕疇咨亮采之至意巴彥學鄭徵摺並發將此通諭知之○丁巳諭軍機大臣等從前王亶望節次貢獻器物止實收數件餘俱發還今閱查抄伊任所貲財發還之物無一存者卽此可見不實昨陳淮來京陛見當經面詢據稱伊彼時已起程來京不能知悉而其詞閃爍甚屬可疑盛住見任藩司兼管織造本有奏事之責且此事與伊無涉又近在同城原委自必深悉著傳諭盛住將查抄王亶望家產究係何人承辦及有無侵蝕抵換情弊逐一確查密奏毋得稍有隱飾○戊午諭內閣學士汪永錫由上書房派出隨至熱河昨因其患病諭令回京調治茲聞在途溘逝著加恩賞給禮部侍郎銜以示

軫恤○己未諭河東河道總督韓鏞見在丁憂所遺員缺緊要見

任淮徐道何裕城從前隨父何煇辦事年久於一切河防事宜尙

屬熟悉何裕城著加恩署理河東河道總督其所遺淮徐道員缺

著劉錫嘏調補○癸亥以陸費墀爲內閣學士

由少詹事遷

八月乙丑朔諭上年甘肅冒賑案監候官犯前經隨剿蘭州逆回

在事出力者俱免死發黑龍江○庚午命設美諾副將○甲戌諭

見在內外大臣中襄贊綸扉侍直樞禁嚴歷封疆宣力年久者均

宜加予宮銜以昭優眷大學士英廉著加太子太保嵇璜著加太

子太保尙書和珅著加太子太保梁國治著加太子少傅總督鄭

大進著加太子少傅薩載著加太子少保李侍堯著加太子太保

福康安著加太子太保以示朕嘉獎勤勞之意○乙亥以徐嗣曾

爲福建布政使許祖京爲雲南按察使

由鹽運使

○庚辰以永保爲直

隸布政使

由清河通運

○壬午諭江蘇淮徐兩府屬水災常予賑恤不

必論月俟水退時停止○命截留江西漕糧三十萬石於山東備

賑○召孫嘉樂來京以繆其吉爲四川按察使○癸未 上自避

暑山莊巡幸木蘭行圍○丁亥扎薩克多羅郡王車布登扎布卒

諭車布登扎布前在軍前甚屬奮勉洵爲國宣力之臣昨聞其病

勢危爲卽遣伊姪拉旺多爾濟並乾清門侍衛台費英阿帶領御

醫前往診視茲聞溘逝深爲惻惻著賞給陀羅經被並銀一千兩

辦理喪事○裁甯夏鎮後營遊擊延綏鎮雙山堡都司

九月戊戌諭刑部進呈雲南省招冊內有該撫原擬情實者鄭起

黃禹鼎二案有由九卿改入情實者三保羅士朝二案覈其情節

俱有可原如回民鄭起與民人管宏亮合夥開墾彼此爭論管宏

亮因鄭起係屬回民忌諱猪油抱住鄭起將猪油抹口該犯正持

刀切物一時不能掙脫用刀嚇截致中管宏亮右髀一傷越日殞命黃禹鼎因沈姓酒醉查詢沈姓卽行詈罵並揪扭推跌毆打該犯掙扎不脫順拔身佩小刀截傷其臂膊肩甲二處殞命此二人者傷由圖脫殺本無心與逞兇疊截者有閒乃該撫定擬情實刑部亦照擬數覆皆由會降諭旨有金刃傷人應入情實一條遂爾不權輕重及傷痕多寡未免過於拘泥至九卿所改情實二起如三保向孫皮匠索欠被毆該犯回毆致斃事本理直死出無心羅士朝因被黃春元父子二人抱住迭加毆踢該犯一時情急用刀嚇割致傷黃春元身死與持刀逞兇者不同九卿改入情實亦未免過當夫金刃殺人所以令入情實者原以此等人犯彼此逞忿輒用金刃殺人不可不嚴行懲儆至其中情罪稍有可原者句到時原可不至予勾此等人犯經十次秋審便可入於緩決各該犯

久坐囹圄既可抑其強悍之氣使眾人亦知所做惕此朕辟以止
辟刑期無刑原非有意從嚴也且卽以金刃傷而論亦當覈其情
事之曲直傷痕之多寡今不詳細確覈一槩入於情實又豈朕矜
愼庶獄之意乎秋讞大典人命攸關理宜悉心推究以期無枉無
縱蘇軾所謂皋陶曰殺之三堯曰宥之三朕嘗著論闕之蓋讞獄
之道必須準情酌理其情真罪當與夫一錢可原者應宥應殺俱
有一定權衡不得存畸重畸輕之見若罪應殺者卽堯亦應曰殺
之三罪應宥者卽皋陶亦應曰宥之三設如所云則是君臣相率
爲僞以取名豈可以爲法乎總之兇暴之徒不可不嚴加懲治若
存姑息欲積陰功則每年秋審竟可不辦令死者含冤地下有是
理乎然欲避寬縱之名而故爲刻深周內則失入之咎比失出爲
尤重凡內外問刑各官皆不可不深體此意也除已進各冊朕逐

一親加詳覈所有未進各省招冊著刑部堂官再行覆覈如有似此等案情俱著於黃冊內本案條下黏籤聲明候朕親定並將此通諭中外知之○諭貝勒永福向來行走甚屬奮勉今扈從園場忽聞溘逝朕心深爲軫念著賞銀一千兩辦理喪事其貝勒例應降等承襲但念永福平日奮勉且在外病歿永福之子著加恩仍襲封貝勒尋以繇譽襲封○辛丑諭軍機大臣等前陳輝祖查抄王亶望物件一案疑有抽換抵兌之事傳諭盛佳令其留心察訪據盛佳奏查出升任糧道王站住首先隨同抄籍有將金易銀那掩情弊此事既經查明原冊不符確有案據自不便置諸不辦見在派侍郎福長安喀甯阿取道河南將王站住解任押帶赴浙質審外所有隨同辦理此事之委員吏役俱見在浙省著傳諭陳輝祖卽同盛佳先行提集在事人證悉心查辦將原冊因何不符及

如何抽抵之處逐一根究務令水落石出其應行解任革職聽審者亦卽一面奏聞一面辦理無庸俟欽差到浙致滋耽閣至陳輝祖上年辦理塘工頗爲出力又係兼管撫篆事務繁多或一時查察不到尙屬情理所有朕於此事開誠布公因陳輝祖受朕深恩必不肯扶同徇隱是以令其會同辦理陳輝祖果能一秉天良盡心查辦將來不過有失察處分朕必加恩寬宥儻不肯實力辦理或意存迴護若經欽差等查出則是自取重戾朕不能復爲曲貸也○諭據尙安奏接暹羅國鄭華稟稱因伊父鄭昭病故臨終屬其尊奉天朝永求福庇茲特齋文稟報俟至貢期當遵例虔備方物朝貢等語鄭昭於上年輸忱獻納極爲恭順是以准其朝貢並加恩賞資筵宴以示懷柔今鄭華遵父遺言效忠輸忱理應專遣使臣具表懇請乃僅遣夷目齋文稟報自不便遽准所請見已令

軍機大臣擬寫檄奏諭以接閱來稟據稱爾父鄭昭業已病故臨終之際諄諄屬汝以尊奉天朝永求福庇爲念理合稟報俟至貢期當遵例虔備方物朝貢等因上年爾父獻表輸忱備物進貢小心恭順經本部堂據情代奏仰蒙聖恩俯准入貢並令貢使附於班聯之末一體入宴瞻仰天顏特加賞賚此皆大皇帝俯鑒爾父惻怛加恩格外至爲優厚今爾父病故爾繼嗣爲長謹遵汝父遺命急欲效忠天朝具見恭順惻怛但汝理應具表叩謝天恩並將爾父身故及爾繼嗣各情節詳晰聲敘本部堂方可據情轉奏今爾僅遣使稟報並稱俟至貢期當遵例虔備方物朝貢等語在爾國僻處遐荒求諳體制但本部堂等職司守土似此情節不敢冒昧代爲具奏見在爾國貢使候有北風即可挂帆歸國俟彼到後傳宣入宴蒙賞爾屢受大皇帝格外鴻慈當益加感激如果欲效

忠輸惓承受天朝封號必須具表自行懇求本部堂方可代爲轉奏用是剴切曉諭爾其知悉此檄該督等卽可遵照辦理發往至該國貢船入境所有壓艙貨物自當照例免其納稅並委委員防護伴送以示體恤將此由五百里諭令知之○吏部議覆陝甘總督李侍堯奏陝省興安州形勢險要戶口較前增至數十倍請改爲興安府兼設撫民通判並於縣屬分設佐雜等員從之○壬寅

上駐蹕避暑山莊 御製避暑山莊後序曰我 皇祖於辛卯

年成此避暑山莊三十六景續圖賦什爲序以行之而予適生於是年此中因緣不可思議卽位後於辛酉年始爲巡狩之舉至山莊徘徊思慕因敬依 元韻以誌景仰甲戌年又增賦三十六景蓋以 皇祖昔曾題額而未經入圖及余遊覽所至隨時題額補定者總弗出 皇祖舊定之範圍故永恬居之詩曰已是洞天傳

玉簡得教福地續琅書永恬居卽 皇祖御書也 御序至矣盡
矣茲後序何爲而作蓋予之生年旣同山莊而予之侍 皇祖適
以壬寅而今歲又恰當壬寅六十餘年蘊於深衷者不可以不明
白宣示以自戒己者戒我後人耳夫居此山莊日懷敬 天法
祖勤政惠民柔遠甯邇諸大端見之詩文者不知凡幾何尙有未
宣之深衷乎無而謂有是欺己有而弗宣是欺人我 皇祖建此
山莊所以詰戎綏遐崇樸愛物之義見於 御製序中意深遠也
是以 皇考十三年之閒雖未舉行此典常 面諭曰予之不往
避暑山莊及木蘭行圍者蓋因日不暇給而性好逸惡殺生是予
之過後世子孫當遵 皇考所行習武木蘭毋忘 家法煌煌
聖訓予與和親王及爾時軍機大臣實共聞之而今皆無其人矣
予如不言後更無知 皇考聖意者又數年來日涉成趣於向所

定景外不無建置如創得齋戒得堂之類不下二十處既見之昨歲知過之論矣而予之意猶有未盡者亦不可不宣示後人也蓋漢唐以來離宮別苑何代無之然不過費人財逞己欲其甚者乃至破國亡家是可戒無足法也若今之山莊乃在關塞之外義重習武不重崇文而今則升府立學駸駸乎崇文矣然杜甫所云將軍不好武稚子總能文之句余常駭之以爲各有其地其職也設眾人遂以此爲美亦美中之不足矣又扈蹕之眾歷數月于役采薇出車古人所以恤下此亦不可不念俾人知其所繫者大且時加惠賜焉則勞而不怨若圖己樂而忘人苦亦非仁人之所爲也若夫崇山峻嶺水態林姿鶴鹿之遊鳶魚之樂加之巖齋溪閣芳草古木物有天然之趣人忘塵世之懷較之漢唐離宮別苑有過之無不及也若耽此而忘一切則予之所爲蘊薌山莊者是陷穽

而予爲得罪 祖宗之人矣此意蓄之久而不忍言今老矣終不可不言故書之旣以自戒仍敬告我後人若後人而忘予此言則與國休戚相關之大臣以及骨鯁忠直之言官執予此言以諫之可也設諫而不從或且罪之者則是天不佑我國家朕亦無如之何也已矣○癸卯諭刑部尙書德福老成歷練宣力有年茲聞患病溘逝深爲軫惜所有應得卹典著該部察例具奏尋予祭葬諡勤肅○以喀爾阿爲刑部尙書○丁未調景祿爲湖南按察使以李天培爲廣東按察使

由肇羅道遷

○己酉諭近觀蒙古世襲家譜知

各蒙古王公子嗣及閒散台吉塔布囊年已及歲者俱各按定例給以應得品級頂帶而宗室中除承襲封爵及見有官職外其閒散宗室向無按品給頂之例見在宗支繁衍瓜陵綿延皆我 祖宗派系流傳譜列銀潢名登 玉牒乃以身無職級竟至與齊

民無別殊不足以示親親而崇體制嗣後著將王貝勒貝子公子
嗣及閒散宗室年已及歲者俱照蒙古王公台吉塔布囊之例分
別給予品級官頂其宗室見在當差職分較小者准其與閒散宗
室一體照例換給官頂在宗室等身有品級自必各知自愛不至
蕩檢踰閑其中或有不肖犯法之人亦照蒙古台吉塔布囊之例
卽行革去官頂如此則於褒榮之中仍寓勸懲之意藉此可以教
育成全而天家子姓俱得邀章服之榮益足昭國家睦族展親之
誼甚盛典也所有如何分別嫡庶等第酌給官頂之處著大學士
軍機大臣會同宗人府詳悉妥議具奏至 聖祖 世宗之孫及
見在皇孫皇曾孫皇元孫輩俱可戴紅絨結頂其如何分別支派
遠近准其戴用之處亦著一併妥議具奏再覺羅雖亦係宗親但
派系稍遠向原准其同旗人應試出仕且有任各省州縣者若一

體另給官頂於見行統屬儀制轉多未協毋庸另行議及將此通諭知之尋會議分別宗室頂帶事宜一 聖祖仁皇帝 世宗憲皇帝之孫未授官爵以前俱戴紅絨結頂至十八歲時視其父之職分遵新例按品換給頂帶補服一 皇孫 皇曾孫 皇元孫輩俱戴紅絨結頂服花褂俟封有爵秩再照所封換給頂帶補服一閒散宗室均賜給四品頂帶四品武職補服一王貝勒貝子入八分公之子應封者親王之子給一品頂帶郡王貝勒之子給二品頂帶貝子入八分公之子給三品頂帶至考試時仍照例分別嫡庶並考試等第辦理一王貝勒貝子入八分公之承繼子雖例不應封究與閒散宗室不同均請給以三品頂帶一閒散宗室犯笞杖等私罪仍照舊例罰養贍銀如犯徒流等罪例折圈禁空室期滿釋放者三年無過該族長保送宗人府准其開復頂帶如再

犯法及應永遠圈禁在家圈禁並發遣盛京者不論支派遠近均革去頂帶一王貝勒貝子公及見任職官革職無餘罪者仍准照閒散宗室用四品頂帶若革職尚有餘罪者均照閒散宗室例分別輕重辦理一宗室年至十八歲時由宗人府查明彙題令其戴用頂帶一盛京居住之宗室請與在京宗室一體給與頂帶從之○諭山東兗曹二府及濟甯州各屬被水最重之處常予賑恤不必論月俟水退時停止○庚戌 上自避暑山莊回鑾○辛亥諭前因陳輝祖查抄王賈望貲財一案彼既恣貪侈用而呈覽物件無甚入觀者疑有抽換情弊然朕本不欲辦但不可不明此疑因傳諭盛住留心察訪嗣據盛住奏查出王站住底冊有金葉金條金錠等共四千七百四十八兩查對解繳內務府進呈冊內並無此項金兩第多列銀七萬三千五百九十四兩係將金易銀又底

冊內有玉山玉瓶子等件亦未載入進呈冊內顯有抽換那掩情弊因派喀甯阿福長安前往查辦並傳諭阿桂先行詢問王站住據實覆奏茲據阿桂奏訊據王站住供稱上年查抄王亶望貲財會同府縣佐雜每日親往點驗交府縣各官收管金約有四千數百餘兩銀約有二三萬兩玉器甚多當即造有三分底冊我於六月初九日起身進京陛見即將底冊一分呈送總督其餘兩分分存藩司糧道衙門我若果有不肖之心豈肯將底冊留於浙省作爲後人把柄至我查辦時總督陳輝祖曾弔取備用物件閱看等語王亶望入官物件該省竟敢抽換藏匿公爲欺罔殊出情理之外此事朕本不欲辦今既查有實據不得不徹底根究見已派阿桂福長安押帶王站住前往浙省審辦矣陳輝祖身爲總督卽無抽換入己之事而於屬員通同抵匿置若罔聞其庸懦無能卽與

勒爾謹無異豈可復膺封疆之任陳輝祖著革職拏問所有閩浙總督員缺著富勒渾補授其河南巡撫員缺著李世傑調補查禮著補授湖南巡撫富勒渾俟李世傑到河南後再起身前赴浙江湖南巡撫事務著舒常帶總督印速往兼署李世傑赴豫必由湖北經過接奉此旨卽帶印迎交舒常接收迅速赴豫將此各諭令知之○諭軍機大臣等陳輝祖查抄王亶望物件一案有抽換抵兌之事見已降旨令阿桂福長安前赴浙江徹底根究矣因思國棟彼時任浙江藩司經手此事且查抄底冊在藩署收存縱使無分肥情弊國棟已有應得之罪非王站住之查辦造冊後卽行離任者可比著傳諭薩載卽將國棟解任派委委員迅速將國棟解赴浙江交阿桂等歸案嚴審辦理見在安徽藩篆需人接署陳淮雖係臬司但曾任浙江鹽道亦係事中之人未便令其接署所有

安徽布政使印務著劉增前往署理其江甯布政使印務著薩載
另委妥員接署○王子以奇豐額爲安徽布政使張誠基爲貴州
按察使由糧通運○以陳用敷爲四川布政使杜琮爲廣西按察使由糧通運

東糧通運○丙辰 上還京師○諭前因浙省查抄王亶望貲財一案

疑有抽換情弊朕意本不欲辦而不可不明此疑因傳諭盛住留心察訪嗣據盛住查有端緒則又不可置之不辨是以派阿桂等
前往浙江查訊並令陳輝祖盛住先行查明據實覆奏茲據陳輝
祖奏以銀易金一款查抄時據調任布政使國棟面稟商換並言
及金色低潮恐解京轉難適用不如易換銀兩較爲實濟遂爾允
行等語所奏全不成話陳輝祖不過因事已敗露無可解免欲藉
此搪塞耳如果陳輝祖欲易銀爲塘工之用即使豫行奏明其事
已屬矯強況當日並未具奏竟與國棟商同舞弊是此項金兩全

係陳輝祖國棟二人抽換抵兌分肥入己自屬顯然此事大奇爲從來所未有國棟著革職拏問交阿桂等歸案審辦至朕辦理庶務推誠布公斷不忍以此疑及大臣是以於盛住奏到時仍降旨令陳輝祖會同審辦不謂竟係伊與國棟起意營私陳輝祖係協辦大學士陳大受之子父子皆任總督世受國恩最爲深重何至喪良無恥至於此極是王亶望所爲係明火執仗而陳輝祖竟同穿窬行徑矣况王亶望之物稍有人心者方當避之若浼而可復染指乎朕於此事不勝慚慙且大臣中有此敗類於顏面攸關內外大臣亦同深愧忿也卽如陳輝祖所稱金色低潮恐解京轉難適用卽應將所有金兩盡行易換何以解交內務府冊又列入金葉九兩三錢明係借此爲掩飾彌縫之地又如所稱照價易換銀七萬餘兩而前阿桂詢問王站住供內又稱有王亶望銀二三萬

兩則是此易金之銀已有王直望少半在內陳輝祖又將何辭抵飾乎况陳輝祖欲留此爲塘工之用如果辦理塘工銀有不敷卽當奏明請項若私欲爲此變易已屬非是乃前據陳輝祖奏稱塘工各項除用去外尙多餘銀三十九萬九千餘兩是塘工費用已屬寬餘陳輝祖早知有盈無絀又何必藉此易金之銀豈非豫爲侵蝕地步耶且王直望貲財器物甚多何不盡以塘工爲名一併易換乎此次陳輝祖摺內止言及易金一款而於玉山等件作何隱匿之處竟無一字提及是其欺罔蒙混更無疑義又本日陳輝祖奏到各摺止列盛住銜名而盛住並未涉一語是盛住明知總督舞弊見有欽差查辦無難得實而又因陳輝祖見係總督身爲屬員未便當面駁詰是以姑隱不言試問陳輝祖又將何顏以對盛住耶此事若未將國棟調任補用盛住則陳輝祖國棟扶同欺

蔽尙不至卽行敗露然伊等昧良欺罔爲天理所不容其敗露亦不過遲速之間耳思之實屬可畏總之此事陳輝祖卽身有百口亦斷無能置喙矣所有陳輝祖覆奏各摺並陳淮奏到之摺俱著發鈔並將此通諭中外知之○丁巳諭據衍聖公孔昭煥奏稱自本年六月以來患病沈重難以承祀等語孔昭煥著准其解職調理伊長子孔憲培前經賞給二品頂帶今已成立卽著承襲衍聖公以奉祀事該部知道○諭前因浙省查抄王直望任所貲財一事呈覽物件大率不堪入目適布政使李封按察使陳淮王杲俱至熱河陛見朕面詢以該省辦理此事有無情弊俱各隱匿不言嗣令盛住查出浙省存留底冊開載金兩玉器與進呈冊內不符顯有抽換抵兌諸弊已著阿桂福長安馳往浙江徹底根究審辦並傳諭李封陳淮王杲三人以此事業經敗露令其將如何串通

舞弊各情節據實自行陳奏昨據陳准覆奏知情其摺已經發鈔
本日又據李封覆奏陳輝祖接見司道時言及查抄王亶望金兩
發與首縣換銀解繳李封並曾向錢塘縣換金五十兩等語是此
案竟係總督與司道等商同作弊實出情理之外李封由府道府
擢藩司係朕加恩特用陳准王杲俱身爲臬司大員經朕面加詢
問雖不至如干易簡之公然欺罔轉將國泰保奏然伊等身在事
中於抽換抵兌情弊俱各知而不言實難辭欺飾徇隱之罪李封
陳准俱著革職發往豫省河工效力贖罪王杲俟伊覆奏到日再
降諭旨藩臬等於督撫雖係屬員平時原應悉心贊助和衷共濟
爲國家出力任事設遇有督撫敗檢營私之事原可據實參奏或
直揭部科方爲不負委任若盡如李封等之聯爲一氣突梯脂韋
又安用司道爲耶至朕於此案本不欲辦卽盛住查奏到時朕不

忍疑及陳輝祖尙令伊會同查辦是朕原未嘗有逆詐億不信之心而展轉敗露又似實有先覺可見天理難誣報應不爽伊等欺朕卽係欺天試問欺天豈有不敗露者而朕又豈易欺乎所有此案辦理緣由並李封原摺俱著發鈔將此通諭中外知之○戊午以景祥爲湖南布政使由按察使遷孫栝爲安徽按察使由江蘇常○己未以伍拉納爲湖南按察使由江南鹽運道遷

冬十月甲子朔諭朕承 上蒼眷佑 列聖垂庥平伊犁定回部闢疆二萬餘里回子伯克盡爲臣僕和闐良玉充貢內廷敬維太廟尊藏 五朝冊寶係隨時鑄造玉色長短未能一律用是選擇精瑣特派大臣董率敬造 五朝冊寶全分以今歲孟冬時享恭奉入 廟舊有 冊寶送至盛京 太室尊藏玉檢金繩虔申對越聿昭我 祖宗功德之成於萬禩甚鉅典也所有恭造餘存

未鐫各分朕親加檢閱其玉色與五朝冊寶相符者均編爲廟
字號俟後有舉行冊寶入廟之事槩用此玉以昭畫一其玉色較
白而未能一律者仍編爲喜字號將來朕歸政後嗣位之皇子崇
上尊稱卽將此玉成造冊寶並嗣後皇孫皇曾孫輩有承事東朝
尊崇徽號者皆以此等喜字號玉一體呈用永爲定制洪惟我

列祖列宗荷天之龍重熙累洽勤求治理不敢康甯用克上

協天心暨於朕躬續緒承庥撫有方夏弗懈益虔克集大勳版

圖式廓迄今年逾古稀猶日孜孜益不敢不敬天益不敢不勤

民自新疆底定以來伊犁將軍及駐紮大臣盡皆恪遵功令撫綏
安輯仰體朕一視同仁德意新疆萬里無不安居樂土效惻拊忱
卽有一二滋事之臣如素誠高樸者皆不旋踵而敗露治罪不動
聲色力加整飭俾享安全是以回部伯克內如色提巴爾第鄂斯

瑞等久在乾清門行走竭誠供役與內地臣民無異其派令採玉者亦皆歡欣踴躍其效子來我子孫繼序繩承敬瞻 冊寶當益懌 天命之難謐知守成之不易聯內外以同心設或稍存怠忽所用非人以致撫馭失宜則和闐珍產未必能源源而至又或意存徵索苛求苦累則不惟玉不可得而且別啓事端其所關繫甚大思艱圖易可不慎乎可不戒乎用是諄切訓諭面命耳提我子孫當以朕此心爲心凝承 鴻貺篤念 前徽永存無疆之恤以保無疆之庥庶無負朕反復教誡之至意此旨著錄三通一存內閣一存上書房一存內務府其敬念無斁欽哉○戊辰諭軍機大臣等據王進泰等奏查審陳輝祖抽換王亶望貲財一案將王站住原抄底冊與咨送內務府崇文門暨外估各冊悉心覈對尙有底冊開載之物而解京及外估各冊內並未造入者計一百宗有

底冊本無而解京及外估各冊內造入者八十九宗名色不符者
二宗其爲當時有心抽匿抵換顯而易見請將始終經手檢查造
冊之知府王士瀚楊仁譽同知楊先儀知縣張翥革職拏問嚴審
一摺已明降諭旨看來此案陳輝祖首先起意以銀易金並抽換
玉瓶玉山子等件而經手之各委員等遂爾通同舞弊肆行抵換
隱匿已無疑義自應徹底根究勿致絲毫遁飾至陳輝祖稱物件
繁多爲時恩遽未及逐件親驗均係何物無由知悉等語王亶望
貨物係上年閏五月查抄遲至十二月始行起解半年之久何至
辦理恩遽陳輝祖此時尙欲遁詞支飾乎至王進泰等於陳輝祖
以銀易金一節並未訊問覆奏自係因阿桂不日到浙是以尙未
逐細研究阿桂等到彼卽遵照節次所降諭旨逐層嚴切訊問迅
速覆奏又本日閱薩載詢問國棟供詞內有陳輝祖稱王亶望查

抄時曾求過總督說金子太多恐怕礙眼不如照依時價易銀將來辦理順易國棟原曾勸阻陳輝祖執意要換等語此事大奇王直望飭法肆貪罪惡已極乃陳輝祖於查抄時尙敢聽其屬求爲之那換掩飾推此則何事不可爲陳輝祖受恩最深乃竟如此昧良欺罔朕將何以用人乎况王直望乃被抄有罪之人豈有向承抄大臣講話之理此必當嚴問者又國棟稱陳輝祖曾說王直望抄出朝珠甚平常難以呈進諭令委員購買數盤添入又將自己朝珠挑選添入國棟亦曾勸過等語此更不成話亦斷無此情理必係陳輝祖將抄出朝珠之佳者私自藏匿反將平常不堪之物當眾人耳目挑選添入以爲抽換地步又國棟供稱目擊委員購買朝珠也曾問過委員價值係委員自備等語更奇是陳輝祖竟令委員墊銀舞弊委員等隱匿偷換又將何所不至乎又國棟稱

陳輝祖向楊先儀要進金子五百兩過了數日又經退出或係總督聽見國棟查問不敢存留等語此一節更屬可笑自係陳輝祖有心侵用亦應詳訊又國棟所稱陳輝祖將多寶樹內玉器取出後止總開列玉器等語是陳輝祖竟明目張膽作此穿窬行徑其侵貪劣蹟亦較之王賈望更爲不堪可鄙又國棟稱陳輝祖逐日將查抄之物分類取進署內查看陳輝祖恩遽無暇何以日日取進查看豈非自相矛盾乎此時福長安自已到浙阿桂亦應一二口內可到著將硃批薩載王進泰原摺發交阿桂等閱看逐條嚴訊陳輝祖此案業已眾證確鑿不患其不據實供吐不可動刑如或陳輝祖堅不承認自應解京審訊阿桂福長安二人內有先行自浙起程者卽押帶進京無難廷訊也再查國棟於本年二月來京陛見時面加詢問此事伊何以並不據實陳奏此卽與子易簡

之罪何異著阿桂等將此嚴行詰問國棟令其據實供吐將此由六百里加緊傳諭阿桂福長安並諭王進泰盛佳知之○癸酉定庫爾喀喇烏蘇新建城名曰慶綏城門東曰撫仁西曰向義南曰溥澤北曰奉恩○甲戌定晶河新建城名曰安阜城門東曰登順西曰永豐南曰輯和北曰保康○壬午以馮光熊爲甘肅布政使山江西按○癸未改廣西桂林府糧捕通判爲思恩府通判移駐崇使遷思恩○甲申諭直隸總督鄭大進老成練達宣力有年簡擢畿疆正資倚任茲聞溘逝深爲軫惜所有應得卹典著該部察例具奏尋予祭葬諡勤恪○諭直隸總督一缺向俱於漢大臣中簡員補放見在各省漢巡撫中再四籌度實無可以勝任之人因思前任總督袁守侗持服守制已滿一年所有直隸總督員缺卽著袁守侗署理朕本不肯令大臣在任守制屢經降有諭旨中外俱所深

悉緣此缺一時不得其人而袁守侗又係久任直隸總督諸事辦理妥協不得不仍令其前往署理袁守侗著俟葬母事畢卽來直隸任事無論袁守侗受朕恩眷且期將逾年喪葬事畢自不以私情而忘公義卽天下臣民諒朕用人不得已之苦心亦可其曉將此通諭知之○以福崧爲浙江巡撫○丙戌以吳之鵬爲江西按察使

由四川

○

庚寅諭甘省收捐監生本欲藉積貯監糧爲備

荒賑恤之用前次開捐時已不免稍有弊端經大學士舒赫德奏

請停止至乾隆三十九年該省復奏請開例彼時大學士于敏中

管理戶部卽行議准又以若准開捐將來可省部撥之煩巧詞飾

奏朕誤聽其言遂爾允行至今引以爲過其時王宜望爲藩司恃

有于敏中爲之庇護公然私收折色將通省各屬災賑歷年捏開

分數以爲侵冒監糧之地設此時于敏中尙在朕必重治其罪姑

念其宣力年久且已身故是以始終成全之不忍追治其罪蓋自
此次開捐監糧以後甘省上下句通一氣竟以朕惠養黎元之政
爲若輩肥身利己之圖侵帑殃民毫無忌憚天下無不共知朕亦
早有風聞而內外臣工並無一人言及思之實爲寒心直至上年
辦理蘇四十三一案據阿桂等屢次奏報得雨降旨查詢始悉歷
年該省旱災請賑全屬虛捏此皆由各該犯昧良觚法天理難容
惡貫滿盈自然敗露今因阿桂等徹底查辦種種情弊和盤托出
實爲從來未有之奇貪異事此案若照侵盜錢糧一千兩以上應
斬正例則所有各犯皆應置之重典特以人數眾多不忍一槩駢
誅因照侵冒銀數多寡稍爲區別並因蘭州被賊滋擾時曾有守
城等事微勞者格外貸其一死除侵冒銀數在二萬兩以上者業
經陸續正法及降旨加恩免死發遣各犯外本日朝審句到尙有

二十三犯內陳起擄史載衡伍諾璽孫元禮吳鼎新等五犯侵冒銀俱在一萬兩以上又無守城微勞法無可貸見已予勾其餘各犯侵冒銀在五千兩以上及五千兩以下之奇明周人傑楊廣賜布瞻景福顧芝廣福吳應祥李立佛保劉炯郭昌泰等十二犯及捏結收受餽送之陳之銓潘時選熊啓謨等三犯俱著加恩免死內旗人奇明等五犯著照善達等之例發往極邊煙瘴地方雖遇大赦不得援照寬釋所生親子著交該旗存記除親軍護軍披甲等差使准其充當其有頂帶職分槩不准其挑補漢人周人傑等十犯著照萬邦英之例發往黑龍江充當苦差雖遇大赦不得援照寬釋該犯等所生親子不准應試出仕至成德陳嚴祖二犯尤非他人可比成德係高晉之子書麟之弟陳嚴祖係陳大受之子陳輝祖之弟該二犯世受國恩身爲大員子弟尤當潔己奉公以

圖報效見有通省貪婪舞弊情事若能直揭部科朕必優加獎擢
乃亦愍不畏法隨同侵帑殃民雖該二犯冒賑銀數在五千兩以
下但係大臣子弟昧良負恩情罪尤重是以予勾俾大臣子弟等
知所儆懼卽爲大臣者亦當引以爲鑒嚴教子弟又巴彥岱一犯
收受餽送代屬員擔承虧空尙屬甘省故習及事敗露又瞻徇隱
匿有心袒護是以予勾此案陸續正法者前後共五十六犯免死
發遣者共四十六犯似此通省捏災冒賑藐法營私案情重大朕
心有所不忍因於萬無可寬之中曲貸其一死實仍不免失之姑
息引以爲愧朕矜慎庶獄凡大小案件無不準情酌理權衡至當
內外大小臣工見此案內之身受大辟者卽當知畏其得邀免死
者當知愧而不當以爲幸經此番懲創之後務須各懷冰淵共矢
小廉大法之誠副朕明刑弼教之意若再有愍不畏死以身試法

者卽當按法處治斷不能如此次之曲爲寬貸也所有辦理此案緣由著通行曉諭中外知之○壬辰諭軍機大臣等據阿桂等奏連日審訊情形將看守之委員官役等設法推究隔別盤詰據劉大呂等供出陳輝祖抽換玉器字畫等件並換金八百兩質之陳輝祖業已供認並究出從前繳庫易金銀兩那移掩飾及倒提年月各情弊見徹底根究一摺已於摺內詳悉批示矣此奏方得實情閱之稍爲爽釋此等偷換隱匿弊竇顯然朕早已鑒及並非冤抑陳輝祖阿桂等抵浙屢次摺奏皆就陳輝祖等一面之詞並案內枝葉餘波支離掩飾並未訊得緊要關鍵若非朕屢降嚴旨訓飭駁詰阿桂等未必肯別求閒隙層層推究至水落石出也則阿桂等意存成見開脫陳輝祖之罪必至代伊受過尙復成何事體幸伊二人及早悔悟不肯沽虛名而受實禍設法盤詰得聞而入

全案盡破果不出朕所料未始非阿桂等之幸也今此案緊要情弊業經訊明將供詞質對明確即可定擬阿桂等此次發摺後自又逐款審究得有確供著傳諭阿桂等於定案後卽自浙起程阿桂順道至山東會同查勘伊家河酌籌興工辦理自運河一帶查勘緩程進京福長安押帶陳輝祖國棟及案內經手各犯速來京審辦又盛佳另摺奏稱於王士瀚楊仁譽補造估冊先後互異不能覺察請交部嚴加議處一摺此事猶屬過之小者盛佳之過在於不爲已甚欲將就了事且瞻顧陳輝祖曾爲總督司道皆其同寅周旋於前不肯反證於後進退無據觀望游移况易金銀兩卽在伊藩庫何以不將諸弊查出盛佳不敢認瞻顧陳輝祖之過而止引失察之咎又屬取巧少年不成器甚屬非是姑念此案係伊先行查出端倪始得展轉敗露是以不加嚴譴僅降旨交部嚴加

議處著將盛佳原摺發交阿桂福長安閱看傳旨訊問盛佳令其據實登答更有何辨一併速奏將此由六百里加緊傳諭知之十一月戊戌諭明興來京陛見面訊以該省辦災事宜據稱濟甯曹州等府所屬各州縣中其被水淹浸之鄉所有村莊查明分數卽遵照恩旨不拘月分給予常川賑恤至未經被水各鄉所有莊戶收成原屬豐稔是以仍照例徵收地丁銀糧等語各省辦理災賑事務雖例應確查實在被水鄉莊給予賑恤毋致冒濫但一州一邑之中其未經被水鄉莊究與災地不遠該處鄉鄰敦任恤之誼有無相通自所必有是未被災之鄰村亦應加意休養使得分其有餘以濟不足著將山東被水各州縣中成災在五分以上者其成熟之各鄉莊槩予緩至明歲秋季徵收以紓民力其與東省毗連之江南徐州等屬並著薩載等查明遵照一體辦理嗣後各

直省遇有災賑事務將成災五分以上州縣之成熟鄉莊俱著照例一體緩徵俾得通融周濟以示朕軫念災黎有加無已之至意著爲令○庚子諭朕披閱 御批通鑑綱目續編內周禮發明張時泰廣義於遼金元事多有議論偏謬及肆行詆毀者通鑑一書關係前代治亂興衰之蹟至綱目祖述麟經筆削惟嚴爲萬世公道所在不可稍涉偏私試問孔子春秋內有一語如發明廣義之肆口嫚罵所云乎向命儒臣編纂通鑑輯覽其中書法體例有關大一統之義者均經朕親加訂正頒示天下如內中國而外夷狄此作史之常例顧以中國之人載中國之事若司馬光朱子義例森嚴亦不過欲辨明正統未有肆行嫚罵者朕於通鑑輯覽內存弘光年號且將唐王桂王事蹟附錄於後又諭存楊維禎正統辨使天下後世曉然於春秋之義實爲大公至正無一毫偏倚之見

至於東夷西戎南蠻北狄因地而名與江南河北山左關右何異
孟子云舜爲東夷之人文王爲西夷之人此無可諱亦不必諱但
以中外過爲軒輊逞其一偏之見妄肆譏訕無論桀犬之吠固屬
無當卽區別統系昭示來許亦並不在于此也況前史載南北朝
相稱互行詆毀此皆當日各爲其主或故爲此訕笑之詞至史筆
係千秋定論豈可逞私臆而廢公道乎夫歷代興亡前鑒不遠人
主之道惟在敬天勤民兢兢業業以絲億萬載之丕基所謂天
難諶命靡常常厥德保厥位誠不在乎區區口舌之爭若主中國
而不能守如宋徽欽之稱臣稱姪於金以致陵夷南渡不久宗社
爲墟卽使史官記載曲爲掩飾亦何補耶所有通鑑綱目續編一
書其遡金元三朝人名地名本應按照新定正史一體更正至發
明廣義內三朝時事不可更易外其議論詆毀之處著交諸皇子

及軍機大臣量爲刪潤以符孔子春秋體例仍令黏籤進呈候朕閱定並將此論冠之編首交武英殿照改本更正後發交直省督撫各一部令各照本抽改將此通諭中外知之○諭通鑑輯覽附錄之載唐王桂王所以匹於宋之帝昷帝昷以示萬世之實錄也館臣以吳三桂爲叛臣不書其擒桂王由榔事而以屬之愛星阿夫愛星阿固爲定西將軍領兵而三桂彼時實爲平西大將軍且必應殄滅由榔三患二難之議發自三桂卽後之進兵撤緬甸歐李定國降自文選皆出自三桂之籌畫其功固不可泯也然其諸籌畫豈實爲我國家哉彼時伊已具欲據滇黔而有之之心由榔定國文選而在伊豈能據之哉蓋自古權奸無時無之亦無地無之三桂之必欲滅由榔實猶近日之阿睦爾撒納之必欲滅達瓦齊達瓦齊而在阿睦爾撒納必不能據準噶爾則彼之爲我宣力

皆所以自爲也今昔相形三桂之奸計畢露又何不可功則功之而罪則罪之乎其依國史三桂傳盡載其入緬事莫刪昔許子將之相曹操兩言撮其要而操亦喜適所舉二人頗甚類之亦在用之而已矣又在先覺之俾毋出我範圍而已矣○丙午諭原任工部尙書周元理前任直隸總督老成勤慎宣力有年嗣復加恩內用游擢尙書後因老病乞休特加太子少傅以示優眷茲聞在籍溘逝深爲軫惻著加恩令江蘇布政使前往賜祭一壇○癸丑命朝審人犯覈決三次分別減等○丁巳晉封固山貝子允祁爲多羅貝勒○戊午以費瀄爲雲南布政使溫葆初爲山西按察使

西左江道遷

○辛酉第二分四庫全書告成

十二月癸亥朔諭軍機大臣等昨披閱明臣奏議熊廷弼爲遼東經略時抒誠效命所奏諸疏具見忠鯁而其時主闇政昏不惟不

用其言轉致身罹重辟深可憫惻熊廷弼係湖北江夏人見在有
無子孫曾否出仕著傳諭舒常等詳悉查明遇便覆奏○甲子諭
大學士九卿覆議阿桂等審訊陳輝祖商同屬員隱匿抽換王亶
望入官財物照例分別擬斬請旨卽行正法及監候等因一摺前
經降旨俟陳輝祖解到審明後再降諭旨今侍郎福長安押帶陳
輝祖及案犯到京復命大學士會同軍機大臣刑部堂官等公同
審訊據陳輝祖所供將查出王亶望金子發交屬員換易銀兩及
隱匿玉器抽換朝珠等事與阿桂等在浙所訊情節雖屬大槩相
同至詰以伊身任浙閩總督一切武備廢弛見在閩省漳泉二郡
民人聚眾拒捕滋事各案何以從前毫無整頓且自王亶望爲浙
江巡撫任內所屬州縣有將倉庫錢糧那移虧缺至今尙有未經
彌補之項何以不行查出參奏伊惟有俯首認罪不能復措一詞

如此則陳輝祖身任兩省總督專意營私置地方要務於不問其
藐法負恩情罪尤爲顯著卽照大學士九卿等覈擬立寘重典亦
屬罪所應得但念此案發覺之始朕以事屬瑣細本不欲辦因盛
往有底冊不符之奏或其時經手之員從中弊混而陳輝祖受其
欺蔽亦未可知然實不疑及陳輝祖身爲狗偷之事也因命大學
士公阿桂侍郎福長安前往查辦以釋此疑陳輝祖始猶狡飾枝
梧希圖卸罪及朕飭令阿桂等四面駁詰始自委官等究出隱匿
抽換諸弊殊出朕意料之外至以金易銀一節據陳輝祖在浙供
稱係查抄時王亶望懇求伊如此辦理朕謂此情理所必無豈有
總督與犯人私相覲面並無司道從役在旁可爲證見之理今據
大學士等覆訊則陳輝祖首稱起意將金易銀思沾餘利並非聽
信王亶望懇求不過借此掩飾屬員耳目其卑劣巧詐果不出朕

所料若如阿桂等原審直似陳輝祖聽信王亶望屬託爲此必無之事而初次奏到之摺尙有金兩並無隱匿抽換之語是阿桂等先有成見於中不復覺其自相矛盾試思朕豈易欺者乎今此案爰書已定前疑頓釋在陳輝祖以陳大受之子受朕厚恩用爲總督不思潔己率屬勉圖報效其於地方應辦諸務不能實心實力隨事整飭於查抄入官之物又復侵吞抽換行同鼠竊其昧良喪恥罔顧罪無可逭但細覈所犯情節與王亶望之捏災冒賑侵帑殃民者究有不同卽較國泰之偕代父贖罪爲名公然勒派屬員以致通省各州縣俱有虧空者亦尙有閒所云與其有聚斂之臣甯有盜臣陳輝祖止一盜臣耳其罪在身爲總督置地方要務於不辦以致諸事廢弛種種貽誤而侵盜者止係入官之物不過無恥貪利罔顧大體究非朘剝小民以致貽誤官方吏治者可比陳

輝祖著從寬改爲應斬監候秋後處決至國棟身爲藩司聽從陳輝祖舞弊營私及朕降旨詢問又甘爲徇隱不行陳奏知府王士幹楊仁譽明知陳輝祖抽換等弊又將估定印冊擅自刪改並私行侵用官物俱按律定擬斬候亦屬允當楊先儀張翥身任首縣迎合上司意指發交鋪戶買金並擅那庫項墊交金價其罪實在於此自應照所擬從重改發新疆充當苦差陳淮前經降旨與李封發往河工效力今據陳輝祖供明尙無通同抽換情弊仍著照前旨行其餘案內各犯俱照大學士九卿等分別覈擬罪名完結朕辦理庶政盤空衡平不稍存偏倚之見此案陳輝祖等通同作弊酌理準情其罪止於如此卽朕不爲已甚之意也嗣後外省官吏當以陳輝祖之見利忘義玷辱封疆大臣之體引爲炯鑒庶幾大法小廉不負朕諄諄教戒之意所有辦理此案緣由著通諭中

外知之○諭各省督撫派委首府首縣辦差從前屢經降旨嚴禁
昨歲因甘省冒賑一案復通諭各督撫嗣後不許交首府首縣買
辦物件以杜弊端乃見在審辦陳輝祖抽換王賈望入官物件竟
有將私換金兩交首縣楊先儀張翥轉發鋪戶售買之事復經訊
出李承鄴噶爾弼善張廷化周曰潢巴國柱何光震等俱先後餽
送陳輝祖金兩多寡不同可見外省屬員逢迎上司代辦物件私
行餽遺其弊仍未盡除卽各督撫年例彙奏並無宴會換帖等項
亦不過具文塞責有名無實於吏治官方所關甚大况金兩本非
尋常日用之物今思前因班禪額爾德尼來京慶祝於熱河建造
扎什倫布廟有需用金兩及金如意官件以備頒賞其時各督撫
卽有呈進備賞金器者以作加賞班禪之用因量爲賞收此係朕
失檢點處或督撫等卽藉此名色向屬員勒索亦未可定見在此

事已過不可不嚴行飭禁嗣後各省督撫除年例呈進土貢物件外槩不許呈進金器如有仍前入獻者奏事處卽行駁回不准接收轉奏各督撫尙其洗心滌慮正己率屬一切衙署私事不得派委首府首縣及別屬承辦庶不負朕再三訓誡激清吏治之至意儼此次飭禁之後尙敢陽奉陰違因循故轍甚或藉辦貢名色勒派屬員許該屬等直揭部科朕必格外嘉獎將該督撫從重懲治決不寬貸教而不悛則有犯必懲毋謂朕不教也將此再行通諭中外知之○丙寅諭軍機大臣等昨披閱明史袁崇煥督師薊遼雖與我朝爲難但尙能忠於所事彼時主閤政昏不能罄其忱悃以致身罹重辟深可憫惻袁崇煥係廣東東莞人見在有無子孫曾否出仕著傳諭尙安詳悉查明遇便覆奏○甲戌諭 皇祖諸孫內惟內大臣弘最年齒加長著加恩封爲輔國公○諭嗣後旗

人承襲他旗同姓世職已歷三世者悉世襲罔替○戊寅御史鄭
澂奏任土作貢自古爲昭所以通上下之情備賞賚之用非有所
利於其閒也各省督撫養廉至爲優厚果其出貢獻納何至派累
侵那乃不意竟如王賁望國棟陳輝祖之流巧滋詐僞曲遂侵漁
以貢獻爲名求索無厭以致屬庫多虧今已嚴禁進呈金器誠足
以永杜弊源但兼金之價不過二十換上下而止有無過費其數
易猶如珠玉寶玩之物爲價無定俱易假託營私請一體飭禁僅
有配入貢器者治以違制之罪得旨如所請行下部知之○辛巳
寅監生趙秉冲內閣中書一體會試○丁亥召王杲來京調孫栢
爲浙江按察使以袁鑒爲安徽按察使曲江甫○己丑諭軍機大
臣等浙省上屆辦理南巡於杭州西湖等處添設座落點綴甚多
繁費無益殊非朕省方問俗之意屢經降旨訓飭而此內葛碩一

處鑿山開道建蓋屋宇尤屬無謂且所費不貲朕心深所不取是
以上屆卽未往臨幸此皆王亶望王燧借辦差爲名肆行糜費外
傳見長之巧陰遂貪縱之私其罪實由於此著傳諭福松於葛嶺
座落斷不必再加修整但係已成之局竟任其自然可也○是歲
朝鮮琉球暹羅來貢○會計天下民穀數各省通共大小男婦二
萬八千一百八十二萬二千六百七十五名口各省通共存倉米
穀四千一百七十三萬九千四百三十三石二斗五合一勺